

四庫全書

經部

欽定四庫全書

經部

周禮注疏卷十一

詳校官監察御史_臣祝德麟

刑部郎中_臣許兆椿覆勘

覆校官庶吉士_臣侍朝

校對官助教_臣汪錫魁

謄錄監生_臣吉孔脩

欽定四庫全書

周禮注疏卷十一

漢鄭氏注

唐陸德明音義

賈公彥疏

小司徒之職掌建邦之教法以稽國中及四郊都鄙之
夫家九比之數以辨其貴賤老幼廢疾凡征役之施舍
與其祭祀飲食喪紀之禁令注稽猶考也夫家猶言男
女也鄭司農云九比謂九夫為井立謂九比者冢宰職
出九賦者之人數也賁謂為卿大夫賤謂占會販賣者

廢疾謂癰病也施當為弛音義

比毗志反注下疏釋曰

徒副貳大司徒之事大司徒已掌十二教故此小司徒又掌建邦之教法言建者非但副貳大司徒亦得專其事云以稽國中及四郊都鄙者大司徒掌邦國都鄙此小司徒亦掌之稽考也故亦考其國中及四郊但國中與四郊皆是六鄉之民所居也併言都鄙者司徒是主土地之官故亦兼主采地之法云之夫家九比之數者謂國中及四郊都鄙之內夫家男女九賦校比人民之數云辨其貴賤老幼廢疾者辨猶別也謂別其貴賤老幼廢疾合科役者科役之云凡征役之施舍者征謂稅之役謂繇役施舍者貴與老幼廢疾不科役故言弛也云與其祭祀者謂鄉中州祭社黨祭綦族祭酺飲食者謂若行鄉飲酒及族食喪紀者謂若四閭為族使之相葬之等禁令者祭祀已下皆有禁令不使失禮法注釋曰夫家猶言男女者夫是丈夫則男也春秋傳曰男有

室女有家婦人稱家故以家為女鄭司農云九比謂九夫為井後鄭不從者以經掌國中及四郊即是六鄉之內但鄉與公邑並為溝洫無井田之法故後鄭不從玄謂九比者冢宰職出九賦者之人數也者案太宰云九賦斂財賄一曰邦中之賦二曰四郊之賦三曰邦甸之賦四曰家稍之賦五曰邦縣之賦六曰邦都之賦與此文國中四郊都鄙其事相當故知此九比出九賦者之人數云貴謂為卿大夫賤謂占會販賣者鄭解諸文貴賤相對皆以為貴謂卿大夫賤謂士獨此賤為占會販賣者以此經論九賦之事案太宰九賦有幣餘之賦幣餘謂占賣國之斥幣此經貴與老幼廢疾皆施舍無賦唯此賦當彼幣餘之賦故為販賣者解之云施當為弛者周禮上下但言為弛舍者乃頒比法于六鄉之大夫經皆為施字鄭皆破從弛

使各登其鄉之衆寡六畜車輦辨其物以歲時入其數

以施政教行徵令注登成也成猶定也衆寡民之多少

物家中之財歲時入其數若今四時言事音義

畜許又反後六

畜皆疏

釋曰言乃頒比法于六鄉之大夫者比法謂若下經五人為伍五伍為兩是也六鄉大夫皆六

命卿為之小司徒為校比之法頒于六鄉大夫又云使各登其鄉之衆寡六畜車輦者衆寡據人民六畜者馬牛羊豕犬雞車謂輦車及大車輦人挽行又辨其物者謂辨其家中財物多少以歲之四時具錄其數入小司徒以施政教者小司徒所施政教依其數而施行之云以行徵令者以徵索於民及所施政令亦據民物等數而行之故云行徵令也注釋曰云登成也成猶定也者人畜衆寡其數不恒家家條錄數而比之則得成故登為成也定也云衆寡民之多少者謂六口已上為多五口已下為少云物家中之財者經既言六畜車輦下別

云辨其物明物是家中之財云歲時入其數若今四時
言事者漢承周後皆四時入其數今時日役簿皆在於
冬代異時殊故有革別也及三年則大比大比則受邦國之比要注

大比謂使天下更簡閱民數及其財物也受邦國之比
要則亦受鄉遂矣鄭司農云五家為比故以比為名今

時八月案比是也要謂其簿疏

釋曰三年一閏天道有成及至也每至三年則

大案比戶口大比之時則天下邦國送要文書來入小
司徒故大比則受邦國之比要也注釋曰云大比謂使
天下更簡閱民數及其財物也者上經頒比法每歲之
四時簡閱衆寡及其物等此經三年大比并天下邦國
而言故鄭云大比謂使天下更簡閱民數及其財物鄭
不言六畜車輦者文略亦簡閱可知云受邦國之比要

則亦受鄉遂矣者此經但受邦國比要上經直言頒比法於六鄉以歲時入其數不言三年大比故此文舍鄉遂也故云亦受鄉遂矣鄭司農云五家為比故以比為名者凡言比者是校比之言但五家為比者案比之法從少至多以五家為始故以比為名云今時八月案比是也者漢時八月案比而造籍書周以三年大比未知定用何月故司農以漢法八月況之云要謂其簿者謂若今之造籍戶口地宅具陳於簿也乃會萬

民之卒伍而用之五人為伍五伍為兩四兩為卒五卒為旅五旅為師五師為軍以起軍旅以作田役以比追胥以令貢賦注用謂使民事之伍兩卒旅師軍皆衆之名兩二十五人卒百人旅五百人師二千五百人軍萬

二千五百人此皆先王所因農事而定軍令者也欲其
恩足相恤義足相救服容相別音聲相識作為也役功
力之事追逐寇也春秋莊十八年夏公追戎于濟西胥
伺捕盜賊也貢嬪婦百工之物賦九賦也鄉之田制與

遂同音義

卒子忽反注及下皆同別彼列反

疏

釋曰小司徒佐大司徒以掌六鄉六軍之士出

自六鄉故預配卒伍百人為卒五人為伍也而用之者即軍旅田役是也五人為伍者下文云凡起徒役無過家一人六鄉之內有比閭族黨州鄉一鄉出一軍六鄉選出六軍今言五人為伍者五家為比家出一人則是一比也在家為比在軍為伍伍者聚也五伍為兩者在鄉五比為閭閭二十五家也在軍五伍為兩兩二十五

人也四兩為卒者在鄉四閭為族族百家也在軍四兩為卒卒百人也五卒為族者在鄉五族為黨黨五百家在軍五卒為族旅五百人也五旅為師師者在鄉五黨為州州二千五百家在軍亦五旅為師師亦二千五百人也五師為軍軍者在鄉五州為鄉鄉萬二千五百家在軍五師為軍軍亦萬二千五百人也以起軍旅者謂征伐也以作田役者謂田獵役作皆是也以比追胥者追謂逐寇胥謂伺捕盜賊以令貢賦者依鄉中家數而施政令以貢賦之事注釋曰用謂使民事之者謂使人為事即軍旅田役是也云兩二十五人已下案經五人為伍轉相增數從五人為伍至五師為軍數可知也云此皆先王所因農事而定軍令者也者案管子書云因內政寄軍令謂在鄉五家為比以營農事比長領之及其出軍家出一人五人為伍則為伍長領之在家閭胥領一閭在軍則為兩司馬領之在家為族師在軍為卒長在家為黨正在軍為旅師在家為州長在軍為師師在鄉

為大夫在軍為軍將自伍長已上全與此文不同者鄭君以義言之非彼正文也云欲其思足相恤至音聲相識言此者解因內政寄軍令之意不使異人間雜於中也云役功力之事者鄭意欲解經文役與田不同也云追逐寇也又引春秋莊公十八年夏公追戎于濟西者案彼傳戎侵魯魯公追之出境服氏云桓公為好莊公獨不能修而見侵濟西曹地穀梁云其不言戎之伐我何也以公之追之不使我適於我也于濟西者大之也引之者證追是逐寇也云胥伺捕盜賊也者以追既為逐寇胥為伺捕盜賊可知云貢嬪婦百工之物者案太宰九職之貢有九此貢獨云嬪婦百工二者此六鄉之貢不論地事則所令之貢亦不及地貢也故以此二事當之云賦九賦也者案太宰九職一曰邦中二曰四郊二者之賦在六鄉之內此經既論六鄉之賦不得有三曰邦甸已下若然此唯有二賦而云九賦者二賦是九賦中物故總云九賦也云鄉之田制與遂同者此經乏

內不見田制案遂人職云夫間有遂遂上有徑十夫有溝溝上有畛百夫有洫洫上有涂千夫有澮澮上有道萬夫有川川上有路是其遂制也故云鄉之田制與遂同案鄭注遂之軍法如六鄉者以其遂內不見出軍之法唯有田制而已故知遂之軍法如六鄉若然彼此各舉一邊互見為義乃均土地以稽其

人民而周知其數上地家七人可任也者家三人中地家六人可任也者二家五人下地家五人可任也者家二人注均平也周猶徧也一家男女七人以上則授之以上地所養者衆也男女五人以下則授之以下地所養者寡也正以七人六人五人為率者有夫有婦然後

為家自二人以至於十為九等七六五者為其中可任
謂丁強任力役之事者出老者一人其餘男女強弱相

半其大數音義

徧音遍七人
以上時掌反

疏

釋曰言乃均土地者以
其佐大司徒掌其土地

人民之數故制上地下地等使得均平故云均土地也
云以稽其人民者既給土地則據土地計考其人民可
任不可任之事云而周知其數者而周徧知其人數云
上地家七人者凡給地有九等此據中地三等而中地
之上所養者七人云可任也者家三人者七人之中一
人為家長餘六人在強弱半強而可任使者家三人云
中地家六人者此謂中地之中所養者家六人云可任
也者二家五人者六人之內一人為家長餘五人在強
弱半不可得言可任者二人半故取兩家併言可任者
二家五人云下地家五人者謂中地之下所養者五人

云可任也者家二人者五人之內一人為家長餘四人在強弱半故云可任者家二人注釋曰云正以七人六人五人為率者有夫有婦然後為家自二人以至於十為九等七六五者為其中者案王制百畝之分上農夫食九人其次食八人其次食七人其次食六人其次食五人彼言五等此云七六五三等其不同故鄭為九等計之此經皆云家故鄭云有夫有婦乃成家從此二人為一等至十人則為九等自二人三人四人是下地之三等也五人六人七人是中地之三等八人九人十人是上地之三等此經唯言七六五者據中地之三等則知有上地之地三等故鄭云七六五者為其中若然王制不云上上之地食十人又不云其次食四人其次食三人其次食二人直言自九以至五不言九等者彼欲取下士視上農夫食九人自府史胥徒四者食八人七人六人五人五等人與此五等農夫相當故不言其餘四者又襄公二十五年楚為掩書土田度山林陂

數澤辨京陵表淳鹵數疆濠規偃豬町原防牧隰臯井
衍沃以授子木禮也此九等是楚之地善惡有九等與
此不同鄭注尚書云賦之差上上出九夫稅上中出八
夫稅為九等者以九州出賦多少不同有九等故鄭君
以井田美惡為九等計之非是貢地之差也云出老者
一人其餘男女強弱相半其大數者但一家之內二人
至十人或男多或少或女多男少不可齊準今皆以
強弱半者周公設法據其大數故鄭云其大數也凡

起徒役毋過家一人以其餘為羨唯田與追胥竭作注

鄭司農云羨饒也田謂獵也追追寇賊也竭作盡行音

義

母音無羨
淺面反

疏

釋曰云凡起徒役毋過家一人者謂起
民徒役作之母過家一人以其餘為羨

者一家兄弟雖多除一人為正卒正卒之外其餘皆為
羨卒云唯田與追胥竭作者田謂田獵追謂逐寇胥謂

伺捕盜賊竭盡也作行也非直正卒一人羨卒盡行以其田與追胥之人多故也此謂六鄉之內上劑致此一人為正卒其餘皆為羨卒若六遂之內以下劑致此一人為正卒一人為羨卒其餘皆為餘夫饒遠故也凡

用衆庶則掌其政教與其戒禁聽其辭訟施其賞罰誅

其犯命者注命所以誓告之疏

釋曰言凡用衆庶者即上經所云是也其衆庶

皆是六鄉之民小司徒主教六鄉六鄉衆是已民故用衆庶之時則掌其政教與其戒禁又聽斷其賞罰又誅責犯命者注釋曰所誓告者謂若大司馬羣吏聽誓於陳前司徒北面以誓之小子斬牲左右以徇陳曰不用命者斬之是其誓告之事也凡國之大事致民大故致餘子注大事

謂戎事也大故謂災寇也鄭司農云國有大事當徵召

會聚百姓則小司徒召聚之餘子謂羨也玄謂餘子卿

大夫之子當守於王宮者也疏

釋曰凡國之大事者謂有兵戎之大事出征之

時云致民者謂有兵戎大事於六鄉之內發起民徒云大故致餘子者謂有災寇之事餘子卿大夫之子弟當大故之時則致餘子與太子使宿衛也注釋曰知大事謂戎事者見左氏成公傳云國之大事在祀與戎此言致民明非祭祀是戎事可知故云大事謂戎事也云大故謂災寇也者經云致餘子明大故非王喪是水火之災及其兵寇司農云餘子謂羨也者以其羨卒唯田與追胥竭作乃使之此經大故不合使羨故鄭不從之玄謂餘子卿大夫之子當守於王宮者也知義然者以經云大故當宿衛王宮案書傳云餘子皆入學則餘子不得為羨是宿衛之人故云餘子卿大夫乃經土地而井之子當守於王宮者也是破司農之義

牧其田野九夫為井四井為邑四邑為丘四丘為甸四
甸為縣四縣為都以任地事而令貢賦凡稅斂之事注
此謂造都鄙也采地制井田異於鄉遂重立國小司徒
為經之立其五溝五塗之界其制似井之字因取名焉
孟子曰夫仁政必自經界始經界不正井田不均穀祿
不平是故暴君姦吏必慢其經界經界既正分田制祿
可坐而定也鄭司農云井牧者春秋傳所謂井衍沃牧
隰臯者也玄謂隰臯之地九夫為牧二牧而當一井今

造都鄙授民田有不易有一易有再易通率二而當一
是之謂井牧昔夏少康在虞思有田一成有衆一旅一
旅之衆而田一成則井牧之法先古然矣九夫為井者
方一里九夫所治之田也此制小司徒經之匠人為之
溝洫相包乃成耳邑丘之屬相連比以出田稅溝洫為
除水害四井為邑方二里四邑為丘方四里四丘為甸
甸之言乘也讀如束甸之甸甸方八里旁加一里則方
十里為一成積百井九百夫其中六十四井五百七十

六夫出田稅三十六井三百二十四夫治洫四甸為縣
方二十里四縣為都方四十里四都方八十里旁加十
里乃得方百里為一同也積萬井九萬夫其四千九十
六井三萬六千八百六十四夫出田稅二千三百四井
二萬七百三十六夫治洫三千六百井三萬二千四百
夫治澮井田之法備於一同今止於都者采地食者皆
四之一其制三等百里之國凡四都一都之田稅入於
王五十里之國凡四縣一縣之田稅入於王二十五里

之國凡四甸一甸之田稅入於王地事謂農牧衡虞也
貢謂九穀山澤之材也賦謂出車徒給繇役也司馬法
曰六尺為步步百為晦晦百為夫夫三為屋屋三為井
井十為通通為匹馬三十家士一人徒二人通十為成
成百井三百家草車一乘士十人徒二十人十成為終
終千井三千家草車十乘士百人徒二百人十終為同
同方百里萬井三萬家草車百乘士千人徒二千人音
義甸繩證反出注注同夫音扶少詩照反沍況疏釋曰
通反為除于偽反乘繩證反下同澮古外反

司徒佐大司徒掌其都鄙都鄙則三等采地是也匠人營溝洫於田掌其經界故云乃經土地經謂為之里數在土地之中立其里數謂井方一里邑方二里之等是也云而井牧其田野者井方一里兼言牧地是次田二牧當上地一井授民田之時上地不易家百畝中地一易家二百畝下地再易家三百畝通率三家受六夫之地一家受二夫與牧地同故云井牧其田野此與下為總目云九夫為井者井方一里九夫之田四井為邑者邑方二里四邑為丘者丘方四里四丘為甸者甸方八里旁加一里則為十里之成今不言十里成而言八里甸者成間有洫井間有溝旁加一里者使治溝洫不出稅舉其八里之甸據實出稅者而言四甸為縣者縣方十六里四縣為都都方三十二里以任地事者謂若太宰九職任萬民謂任役萬民使營地事云而令貢賦者貢則九職之貢賦謂軍賦出車徒之等云凡稅斂之事者米地之中皆為井田之法一井之田一夫稅入於官

故云稅斂之事注釋曰鄭知此謂造都鄙者鄉遂公邑之中皆為溝洫之法此經為井田之法故知謂造都鄙也云采地制井田異於鄉遂者案遂人夫間有遂之等是溝洫法鄉之田制與遂同此經與匠人為井田法其制與鄉遂不同故云采地制井田異於鄉遂也此雖不言異於公邑公邑亦與遂同故注匠人云異於鄉遂及公邑是也云重立國小司徒為經之立其五溝五塗之界者此鄭意匠人於都鄙之中營造溝洫此小司徒又經之立五溝五塗之界則經丘甸縣都並據境界而言但此都鄙是畿內之國小司徒與匠人共掌之云其制似井之字因取名焉者此解經井字謂正方一里之內方三百步百步為一截縱亦二截橫亦二截則為九夫夫各百步其中為井字故云似井字因取名焉名為井田也云孟子曰已下至坐而定也者案孟子滕文公使大夫畢戰問孟子井田之法孟子對此辭孟子云經界者則此經九夫為井已下四縣為都以上故引以證之

鄭司農云井牧者春秋傳所謂井衍沃牧隰臯者也司農引春秋者襄公二十五年楚為掩書土田之事井衍沃者衍沃謂上地下平曰衍饒沃之地九夫為一井牧隰臯者下溼曰隰近臯澤之地司農之意經有井牧故引以當之玄謂隰臯之地九夫為牧二牧而當一井今造都鄙授民田有不易者家百畝有一易者家二百畝有再易者家三百畝通率二而當一者是三家受六夫之地是隰臯之地二牧始當一井故云二而當一云是之謂井牧者此就足司農之義云昔夏后少康在虞思有田一成有衆一旅者此是哀公元年左氏傳伍員云昔過澆滅夏后相后緡方娠逃出自竇歸於有仍生少康焉為仍牧正澆使椒求之逃奔有虞為之庖正虞思於是妻之以二姚而邑諸綸有田一成有衆一旅是其事也言有田一成有衆一旅者則地以上中下為率以為其成方十里九百夫之地一旅五百夫故知是通率之通率之法正應四百五十人言一旅舉成數也亦容

不易者多云一旅之衆而田一成則井牧之法先古然
矣者鄭言此者井牧之法自夏而有非祇於周云九夫
為井者方一里九夫所治之田也者一井之內地有九
夫假令盡是上地不易家有百畝中一夫入於公四畔
八夫家治百畝尚無九夫所治況其中或有一易再易
所取數更少今鄭云方一里九夫所治之田鄭據地有
九夫而言非謂有九家也云此制小司徒經之者即此
丈乃經土地是也云匠人為之溝洫者案匠人云井間
有溝成間有洫同間有澮是匠人為之溝洫也云相包
乃成耳者司徒立其界匠人為其溝相包含乃成其事
耳云邑丘之屬者之屬中含甸及縣都云相連比以
出田稅者從井邑至縣都從內向外界相連比井稅一
夫故言以出田稅云溝洫為除水害者尚書益稷云澮
畎澮距川是其從畎遂溝洫次第入澮入川故云為除
水害也云四井為邑方二里四邑為丘方四里四丘為
甸甸之言乘也者欲見甸中出長轂一乘云讀如衷甸

之甸者案哀十七年衛侯為虎幄於藉圃成求令名者而與之始食焉太子請使良夫良夫乘衷甸兩牡紫衣狐裘而至袒裘不釋劔而食太子數之三罪而殺之鄭依此而言也引之者證甸得為乘之義云甸方八里旁加一里則方十里為一成者欲就匠人解之匠人云成方十里此言四丘為甸甸與成其實一也故鄭覆解成與甸相表裏之意云積百井九百夫者但一成之內方十里開方之得百井井有九夫故云九百夫云其中六十四井五百七十六夫出田稅者此就甸方八里而言八里之內開方之八八六十四故云六十四井井有九夫故五百七十六夫井稅一夫故云出田稅云三十六井三百二十四夫治洫者此據甸方八里之外四面加一里為成而言成有百井中央八里除六十四井餘有三十六井井有九夫故三百二十四夫治洫不使稅鄭言此者見經四丘為甸據實出稅而言故不言成也若然方里為井井間有溝溝廣四尺深四尺方十里為成

成間有洫廣八尺深八尺治溝洫者皆不出稅獨言治
洫者據外而言其實治溝亦不出稅總在六十四井之
內以洫言之矣云四甸為縣方二十里者甸方八里縣
應方十六里云方二十里據通治洫旁加一里為成而
言云四縣為都方四十里者縣方二十里四縣為都故
方四十里云四都方八十里者自此已上並據通治洫
而言云旁加十里乃得方百里為一同也者案匠人方
百里為同同間有澮今言乃得方百里為一同者就匠
人為同解之云積萬井九萬夫者據百里開方而言百
里者縱橫各百一行方一里者百百行故萬井一井有
九夫故有九萬夫云其四千九十六井三萬六千八百
六十四夫出田稅者此據從甸方八里出田稅四甸為
縣縣方十六里四縣為都都方三十二里四都方六十
四里據六十四里之內開方之縱橫各一里一截為六
十四截行別有六十四井六十四行計得四千九十六
井井有九夫四千九十六井計得三萬六千八百六十

四夫是實出田稅者云二千三百四井二萬七百三十
六夫治洹者此據甸方八里旁加一里為成是不出稅
治洹之夫而言之也從四成積為一縣縣方二十里四
縣為都都方四十里四都方八十里開方之縱橫各一
里一截為八十截一行八十井八八六十四為六千四
百井就裏除四千九十六井其餘二千三百四井在井
有九夫二千三百四井為二萬七百三十六夫不出稅
使之治洹也云三千六百井三萬二千四百夫治澮者
此據四成為縣縣方二十里二十里更加五里即為大
夫家邑也縣方二十五里四縣是小都五十里是六卿
之采地四都為方百里一同即為三公王子母弟之大
都也但據百里開方之即為萬井就萬井之內除去六
千四百井其餘三千六百井在井有九夫則為三萬二
千四百夫不出稅使之治澮云井田之法備於一同者
案匠人云井間有溝成間有洹同間有澮是井田之法
備於一同也云今止於都者采地食者皆四之一者解

此四縣為都據小都五十里而言是止於都也以其采地食者皆四分之一稅入天子故云采地食者皆四之一也案上諸男之地亦四之一故云采地食者皆四之一云其制三等者謂家邑小都大都云百里之國凡四都一都之田稅入於王者百里國謂大都也四都謂方五百里者四小都成一大都一都之田稅入王其餘三都留自入云五十里之國凡四縣一縣之田稅入於王者五十里之國謂小都一縣田稅入於王餘三縣留自入云二十五里之國凡四甸一甸之田稅入於王者二十五里之國謂家邑也四甸之中以一甸之稅入於王其餘三甸留自入鄭具言此者欲見四丘為甸是家邑據稅於王者而言四甸為縣是小都亦據一縣稅入於王者而言四縣為都是大都亦據一都稅入於王者而言故鄭云井田之法備於一同今止於都者采地之稅四之一故以此解之云地事謂農牧衡虞也者謂采地之中亦有九職農則三農生九穀牧則藪牧以蕃鳥獸

衡虞則虞衡作山澤之材九職唯言此三者以其經言地事故舉以言之其餘六者略而不言矣云貢謂九穀山澤之材也者此貢還出於農衡地事既無九職則貢中亦無九貢也云賦謂出車徒給繇役也者以其采地之內無口率出錢入天子之法故以賦為軍賦解之若然太宰九賦四曰家稍之賦五曰邦縣之賦六曰邦都之賦者謂三等采地之外皆有公邑公邑之內口率賦錢入於王家但公邑無名故借三等之號以表之故禮雜問志云稍縣都鄙地有公邑之民口率出泉於王也邦國都無口率之賦唯有軍賦草車匹馬士徒而已是也故此鄭引司馬法證之司馬法者齊景公時大夫田穰苴作司馬法至六國時齊威王大夫等追論古法又作司馬法附於穰苴言晦百為夫謂一夫之地方百步夫三為屋屋具也具出穀稅屋三為井者謂九夫為井似井字云井十為通者據一成之內一里一截縱橫各十截為行一行十井十行據一成一畔通頭故名井十

為一通通為匹馬者十井之內井有九夫十井為九十夫之地宮室塗巷三分去一唯有六十夫地在不易一易再易通率三夫受六夫之地三十夫受六十夫之地唯三十家使出馬一匹故云通為匹馬云士一人徒二人三十家出三人士謂甲士徒謂步卒云通十為成成百井三百家草車一乘士十人徒二十人者一成之內有十通言三百家者亦如前通率法一成之內地有九百夫宮室塗巷三分去一不易一易再易通率二而當一故一成唯有三百家草車一乘士十人徒二十人此謂天子畿內采地法鄭注論語道千乘之國亦引司馬法彼是畿外邦國法彼草車一乘甲士三人步卒七十二人甲士少步卒多此士十人徒二十人此畿外甲士多步卒少外內有異故也云十成為終者謂同方百里之內十里一截為縱橫各十截為十行行別十成言十成為終據同一畔終頭而言云終十井者十成成百井故十井三千家草車十乘士百人徒二百人云十終為

同同方百里者謂之為同者取象雷震百里所聞同故名百里為同故云十終為同同方百里萬井也云三萬家車車百乘士千人徒二千人者所計皆如上一成為法其餘可知凡出軍之法先六鄉賦不止次出六遂賦猶不止徵兵於公邑及三等采賦猶不止乃徵兵於諸侯大國三軍次國二軍小國一軍此軍等皆出於鄉遂賦猶不止則諸侯有遍境乃分地域而辨其守施其職出之法則千乘之賦是也

而平其政注分地域謂建邦國造都鄙制鄉遂也辨其守謂衡虞之屬職謂九職也政稅也政當作征故書域

為邦杜子春云當為域音義

政依注音征

疏

釋曰小司徒佐大司徒主土地

言分地域者謂建邦國之等各有所營域遠近疆界辨其守者謂邦國都鄙之內所有山川使衡虞守之故云辨

其守也施其職者謂施民者之職平其政者天下所有
征稅皆均平之注釋曰鄭知分地域謂建邦國造都鄙
制鄉遂者案大司徒職掌天下土地之圖周知人民之
數小司徒佐之明分地域者亦普及天下也是以知分
地域之中有畿外邦國畿內都鄙及六鄉六遂鄭雖不
言公邑地域之中亦含有四等公邑可知云辨其守謂
衡虞之屬者以其山林川澤皆使其地之民守之故其
官川衡林衡山虞澤虞之屬主當云職謂九職者此經
皆論地事故知職是九職任萬民者也云政稅也者以
其經文承九職之下而云平其政者即是平九職之稅
故云政稅也但經云政教之政故云政當作征以為征
字也云故書域為邦杜子春云讀為域者故書云分地
邦非其義意故

凡小祭祀奉牛牲羞其肆注小祭祀王

玄冕所祭音義

肆託

疏

釋曰大司徒云祀五帝奉牛牲
蓋其肆今於小祭祀則小司徒

奉牛牲羞其肆注釋曰案司服職云羣小祀則玄冕彼注云小祭祀林澤百物其於天神亦有小祀則風師雨師之等小祭祀既用牛則王之祭祀無不用牛者案酒正注以六冕羞之緇冕所祭亦入小祀中今鄭不言之者以其社稷五祀於祭饌之事入次祀中故宗伯云小血祭祀社稷五祀五嶽故於此奉牛牲不言緇冕矣小

賓客令野修道委積注小賓客諸侯之使臣音義

使所吏反

疏

釋曰案大司徒職大賓客令野脩道委積謂五等諸侯來朝者此小賓客諸侯使卿大夫來聘故小司徒

令野修道委積大司徒注令

大軍旅帥其衆庶注帥帥

而致於大司徒疏

注釋曰案大司徒職大軍旅以旗致萬民明此大軍旅帥其衆庶者小司

徒於六鄉之內帥其衆庶致與大司徒可知

小軍旅巡役治其政令注巡役

小力役之事則巡行之音義

行下孟反

疏

釋曰案大司徒大軍旅大田役而治

其徒庶之政令故此小軍旅巡役小司徒治其政令注

釋曰此經小軍旅謂使臣征伐對大軍旅天子親行此

經巡役文承小軍旅下故知小力役之事大喪帥邦役

治其政教注喪役正棺引窆復土音義

窆彼驗反劉補鄭反復劉音福

一音疏

釋曰云大喪者謂王喪帥邦役者邦國也帥領國民謂六鄉衆庶役使之事因即治其政教注

釋曰鄭解經大喪所役不據初死以其初死所役無多

故據葬時而言言正棺者謂若七月而葬朝廟之時正

棺於廟引謂葬時引柩車自廟至壙窆謂下棺於坎天

子六紼四碑背碑挽引而下棺云復土者掘坎之時掘

土向外下棺之後反復此凡建邦國立其社稷正其畿

土以為丘陵故云復土也

周禮注疏

十七

疆之封注畿九畿疏

釋曰言邦國者謂立畿外諸侯邦國立其社稷者諸侯亦有三社三

稷謂國社侯社勝國之社皆有稷配之言立其社稷謂以文書法度與之不可國國身往也正其畿疆者謂九畿畿上皆有疆界封樹以為阻固也注釋曰案司馬除王畿以外仍有九畿謂侯甸男采衛要以內六服為中國其外更言夷鎮蕃三服為夷狄王畿四面凡民訟以皆有此九畿相去各五百里故云畿謂九畿

地比正之注鄭司農云以田畔所與比正斷其訟音義

斷丁疏

釋曰民訟六鄉之民有爭訟之事是非難辨故以地之比鄰知其是非者共正斷其訟

地

訟以圖正之注地訟爭疆界者圖謂邦國本圖疏

注釋曰言

地訟爭疆界者謂民於疆界之上橫相侵削者也圖謂邦國本圖者凡量地以制邑初封量之時即有地圖在

於官府於後民有訟者則以本圖正之

歲終則攷其屬官之治成而誅賞

注治成治事之計音義

治直吏反注治成及下文同

疏

釋曰歲終者謂周之歲終

建亥之月則考其屬官之治成者屬官謂教官六十成謂計簿正所治計會文書而誅賞者據其考狀有罪則誅責之有功則賞之注釋曰知治成是治事之計者案宰夫職歲計言會月計言要日計言成故知此成是治事之計也令羣吏正要會而致事疏

釋曰云令羣吏正要會者羣吏謂當職六十官

此亦是歲終之時正要會而致事者上經成據日小成之計此言要會謂是月計歲計總為簿書而致其事之功狀以待考也

正歲則帥其屬而觀教法之象徇以木鐸曰不

用法者國有常刑令羣吏憲禁令修法糾職以待邦治

注憲表縣之疏

釋曰大司徒以正月之吉始和十二教之等正歲建寅之月縣之此小司徒佐

大司徒於正歲縣教象之時率其六十官之屬於雉門之外而觀教法之象也徇以木鐸已下者謂觀教象之時恐衆人離合不聽用其教而徇行振以木鐸使靜聽之告之曰不用法者國有常刑言此者使人懼而用之又令羣吏憲禁令者謂禁人使行不為非憲謂表縣之也謂若小宰縣禁令文書使百官用云修法糾職者謂修其法制糾察職事以待邦治者以待國家有治則供之注釋曰此憲與布憲之字同彼是表縣刑禁以示人此憲亦是將以示人故云憲表縣之也

及大比六鄉四郊之吏平教治正

政事攷夫屋及其衆寡六畜兵器以待政令注四郊之

吏吏在四郊之內主民事者夫三為屋屋三為井出地

貢者三三相任疏

釋曰言及大比者亦是三年大校比戶口云六鄉四鄙之吏者謂是六鄉

之內比長閭胥已上布列在於四鄙云平教治者以其三年大比之時大黜陟之禮故斷其教治文書正政事者復須正直其政事公狀考夫屋者考練其三夫為屋出地貢之時以相保任不得隱誤及其衆寡者謂人民多少六畜兵器者謂民之資生及征伐之器以待政令者以待國家政令所須則供之也注釋曰四鄙之吏吏在四鄙之內主民事者遠郊之外為六遂內為六鄉六鄉之民非直在城中亦在四郊故比長閭胥六鄉之吏等布在四郊之內主民事者也云夫三為屋屋三為井者鄉遂之內既不為井田而為溝洫之法今云夫三為屋屋三為井者以其溝洫雖為貢出貢之時亦三三相保任以出穀稅故鄭云出地貢者三三相任也一井之內九夫三夫為屋是一屋三夫自相保任故云三三相任據一井而言也似井田之法亦八家勸一夫稅入於

公相保任以
出穀者也

鄉師之職各掌其所治鄉之教而聽其治注聽謂平察

之音義

治直吏反下
六鄉之治同

疏

釋曰云各掌其所治鄉之教者
鄉師四人其鄉有六二人共主

三鄉故言各掌其所治鄉之教也云而聽其治者自鄉
大夫以下至伍長各自聽斷其民今鄉師又聽其治者
恐鄉官有濫失審察之
故鄭云聽謂平察之以國比之法以時稽其夫家衆

寡辨其老幼貴賤廢疾馬牛之物辨其可任者與其施

舍者掌其戒令糾禁聽其獄訟注施舍謂應復免不給

繇役音義

復音
福

疏

釋曰云以國比之法者案小司徒職
云九比之數以辨其貴賤老幼廢疾

此鄉師以小司徒國比之法云以時稽其夫家衆寡者謂四時稽考其夫家男女衆寡多少云辨其可任者謂上地家七人可任者家三人之等云與其施舍者鄭云謂應復免不給繇役即上云廢疾老幼者是也 大

役則帥民徒而至治其政令既役則受州里之役要以攷司空之辟以逆其役事注而至至作部曲也既已也

役要所遣民徒之數辟功作章程逆猶鉤考也鄭司農

云辟法也音義

辟婢亦反疏釋曰言大役者謂築作隄防城郭等大役使其民鄉師則於當

鄉之內帥民徒而至至謂至作所也云治其政令者於所帥民徒之中政令也云既役則受州里之役要者所役之民出於州里今欲鉤考所作功程須得所遣民徒本數故云既役則受州里之役要役要則役人簿要云

以考司空之辟者辟謂功程司空主役作故將此役要以鈎考司空之功程云以逆其役事者逆則鈎考也鈎考役事者恐有濫失注釋曰云而至于作部曲也者所營作之處皆有部曲分別故云部曲也云辟功作章程者功作之事曰錄其程限謂之章程鄭司農云辟法也考功作章程則是法於義得通故引之在下 凡

邦事令作秩敘注事功力之事秩常也敘猶次也事有

常次則不偏匱音義

偏鄙力反
匱其位反

疏

釋曰邦國也凡國家
有功作之事故云邦

事也令作秩敘者秩常也功作之處皆出政令使多少有常事有次敘故云令作秩敘注釋曰言事有常次則不偏匱者謂營作之事多少有常事有次敘則民不為偏迫又不匱乏故云不偏匱 大祭祀羞牛

牲共茅菹注杜子春云菹當為菹以茅為菹若葵菹也

鄭大夫讀菹為藉謂祭前藉也易曰藉用白茅无咎玄
謂菹士虞禮所謂苴刈茅長五寸束之者是也祝設于
几東席上命佐食取黍稷祭于苴三取膚祭祭如初此
所以承祭既祭蓋束而去之守桃職云既祭藏其隋是

與音義

菹子都反一音子餘反或云杜側魚反鄭將呂
反菹側魚反藉慈夜反下皆同或云此如字下

皆慈夜反苴子都反又將呂反荆音忖去羌呂
反桃他彫反隋戚吁恚反劉相恚反與音餘

疏

釋曰
案大

司徒職云奉牛牲此又云羞牛牲者鄉師佐大司徒故
此云羞牛牲也云共茅菹者案甸師職共蕭茅彼直共
茅與此鄉師鄉師得茅束而切之長五寸立之祭前以
藉祭故云茅菹也注釋曰杜子春云菹當為苴以茅為

菹若葵菹者但茅草不堪食故後鄭不從鄭大夫讀菹為藉謂祭前藉此後鄭從之又引易曰藉用白茅无咎者大過初六爻辭引之者證藉為藉之義玄謂藉士虞禮所謂直荆茅長五寸束之者是也引之者欲見其藉為祭之藉此增成鄭大夫之義又云祝設于几東至所以承祭解所以藉祭之意云既祭蓋束而去之并引守祧職者欲見此是祭神之餘不可虛棄必當藏之所藏者即守祧職既祭藏其隋是也言隋者謂祭黍稷三及膚祭如初皆隋減以祭之故名為隋

大軍旅會同正治

其徒役與其輦輦戮其犯命者注輦駕馬輦人輓行所以載任器也止以為蕃營司馬法曰夏后氏謂輦曰余車殷曰胡奴車周曰輜輦輦一斧一斤一鑿一耜一鋤

周輦加二版二築又曰夏后氏二十人而輦殷十八人

而輦周十五人而輦故書輦作連鄭司農云連讀為輦

音義

輦九玉反輓晚裡里其反

音

疏

釋曰云大軍旅者謂王行征伐云大會同者謂王於國外與諸

侯行時會殷同也云正治其徒役者謂六軍之外別有民徒使役皆出於鄉故鄉師治其徒役云與其輦輦者輦駕馬所以載輜重輦所以載任器亦鄉師治之故云與其輦輦也云戮其犯命者謂徒役之中有犯教命者亦鄉師刑戮之注釋曰知輦是駕馬者以其輦是人輓行故輦是駕馬可知知輦不駕牛者以其牛唯駕大車相車等云所以載任器也者謂任使之器則司馬法所云者是也引司馬法曰夏后氏謂輦曰余車殷曰胡奴車者胡則北狄是也周曰輜輦以其載束輜重云一裡者或解以為插也或解以為鍬也鍬插亦不殊云周輦

欽定四庫全書

周禮注疏
卷十一

三

加二版二築者築者築杵也謂須築軍壘壁又曰夏后氏二十人而輦以下亦是司馬法文以上說所載任器以下說輓人多少前代寬質無版築輓人多後代狹劣加版築輓人少引之者證周輦即此經輦一也又并見所載之器

大喪用役則帥其民而至遂治之注治謂監督其

事疏

注釋曰言大喪用役謂若喪時輓六引之等鄉之大夫既主鄉民役用鄉民之時鄉師遂治之云治

謂監督者謂監督督察其事

及葬執燹以與匠師御匱而治役注匠

師事官之屬其於司空若鄉師之於司徒也鄉師主役

匠師主衆匠共主葬引雜記曰升正樞諸侯執紼五百

人四紼皆銜枚司馬執鐸左八人右八人匠人執翽以

御樞天子六引禮依此云鄭司農云翺羽葆幢也爾雅

曰燾翳也以指麾輓樞之役正其行列進退音義

燾桃報反

劉音毒匿音舊綽音弗翺劉音桃戚徒報疏釋曰言及

反羽音雨幢直江反行戶剛反下行列同葬引向墳執燾者燾謂葆幢也鄉師執葆幢却行在樞

車之前以與匠師御樞謂在路恐有傾覆故與匠師御

正其樞而治役者亦謂監督役人也注釋曰匠師事官

之屬者以其事官是主工匠之職此官又名匠師故知

匠師事官之屬官也云其於司空若鄉師之於司徒也

者地官之考稱鄉師春官之考稱肆師秋官之考稱士

師唯有天官之考稱宰夫夏官之考稱軍司馬自外皆

稱師此經鄉師是司徒考明匠師亦是司空考故云其

於司空若鄉師之於司徒案天官注冬官亡未聞其考

此云匠師冬官考者彼據冬官亡故云未聞其考此據

欽定四庫全書

周禮注疏

卷十一

二

匠師與鄉師相對以義約之故云匠師冬官考也云鄉師主役匠師主衆匠共主葬引者冬官亡雖無文以其主匠即知共葬也雜記曰升正柩者案彼注謂將葬朝於祖正棺於廟云諸侯執紼五百人鄭彼注云一黨之民云四紼皆銜枚者謂引之時銜枚所以止譁驚云執紼左八人右八人者謂夾柩車匠師執翬羽葆幢此諸侯之禮引之者以天子無文引以況天子之法案彼鄭注天子千人與言執翬羽葆幢者彼文唯有執翬無羽葆幢之言今云羽葆幢者鄭因釋翬是羽葆幢又引爾雅曰翬翬也指麾輓柩之役正其行列進退者天子六紼千人執之執翬者柩車恐傾側執翬以指麾輓柩之役人役人治喪者使柩車令不傾側又千人執輓以持六紼恐行列進退失所皆以翬指麾之故云正其行列進退也雜記諸侯禮匠師執翬此天子禮鄉師執翬尊卑不及窆執斧以泣匠師注匠師主豐碑之事執斧同也

以涖之使戒其事故書涖作立鄭司農云寔謂葬下棺也春秋傳曰日中而塋禮記所謂封者立讀為涖涖謂

臨視也音義

塋補鄧反封彼驗反

疏

釋曰及至也寔是下棺也至塋下棺之時鄉師執斧以涖

匠師匠師主衆匠恐下棺不得所須有用斧之事故執斧以臨視之注釋曰云匠師主豐碑之事者案檀弓云公室視豐碑三家視桓楹鄭彼注天子斷大木為之豐大也天子六緯四碑前後各一碑各重鹿盧兩畔各一碑皆單鹿盧天子十人分置於六緯皆背碑負引擊鼓以為縱舍之節匠師主當之故云匠師主豐碑之事也云執斧以涖之使戒其事者鄉師執斧以臨之者恐匠師不戒其事須有用斧之處故執斧助之使匠師戒其事又云故書涖作立者於義無取後鄭讀還從涖司農云寔謂葬下棺也者三禮及諸文但言寔者皆是下棺

故引春秋傳也案左氏昭十二年三月鄭簡公卒將葬司墓之室有當道者毀之則朝而塋弗毀則日中而塋子太叔請毀之子產遂不毀日中而葬又引禮記所謂封者紫王制庶人縣封而葬喪大記亦云以鼓封皆為封字塋封及此經窆字雖異皆是下棺之事凡四時之云立讀為涖涖謂臨視也者謂臨視匠師也

田前期出田法于州里簡其鼓鐸旗物兵器修其卒伍

注田法人徒及所當有疏

釋曰言四時之田者謂春蒐夏苗等凡田獵人徒等皆出

於州里故未田獵之前須鼓鐸旗物之器故預簡閱云修其卒伍者謂百人為卒五人為伍皆須修治預為配當注釋曰云人徒者即經卒伍是也及所當有者則經鼓鐸旗物兵器是也及期以司徒之

大旗致衆庶而陳之以旗物辨鄉邑而治其政令刑禁

巡其前後之屯而戮其犯命者斷其爭禽之訟注司徒致衆庶者以熊虎之旗此又以之明為司徒致之大夫致衆當以鳥隼之旗陳之以旗物以表正其行列辨別異也故書巡作述屯或為臀鄭大夫讀屯為課殷杜子春讀為在後曰殿謂前後屯兵也玄謂前後屯車徒異

部也今書多為屯從屯音義

斷丁亂反明為于偽反下為州長為鄉大夫為州黨

同隼雖允反旗音餘別疏釋曰云及期謂至田獵之期彼列反殿都逼反下同日云以司徒之大旗致衆庶者鄉師為司徒致衆庶故還用司徒之大旗言致衆庶者謂植旗期民於其下云而陳之以旗物者陳列衆庶

之時亦植旗於行首云辨鄉邑者田獵之時非直有六鄉之衆亦有公邑之民分別之云而治其政令刑禁者鄉師治其民庶政令及刑禁等云巡其前後之屯者謂兵衆屯聚各有車徒各於前後而巡行之而戮其犯命者但民庶之等各有一軍將教命犯命者則戮之又云斷其爭禽之訟者田獵得大獸公之小禽私之有爭禽之訟鄉師斷之注釋曰云司徒致衆庶者以熊虎之旗者司常職云熊虎為旗此經云司徒大旗故知司徒自致衆庶以熊虎為旗也云此又以之明為司徒致之者此鄉師也經云以司徒大旗明用司徒大旗故知為司徒致之也云大夫致衆當以鳥隼之旗者案司常陳九旗之次云日月為常交龍為旂通帛為旛雜帛為物熊虎為旗鳥隼為旗又云孤卿建旛大夫士建物大司徒既是卿官尋常建旛在軍建熊虎鄉師既是大夫官尋常建物在旛下明在軍當以鳥隼之旗在熊虎下可知云鄭大夫讀屯為課殿者未知鄭大夫所讀更出何文或

謂當時俗有課殿之語故讀從之云杜子春讀為在後
曰殿者謂軍在前曰啓在後曰殿云謂前後屯兵也者
屯兵則是殿兵也玄謂前後屯車徒異部也者謂大司
馬云險野人為主易野車為主是車徒異部也云今書
多為屯從屯者謂故書之內為殿凡四時之徵令有常
者少為屯者多以多言之宜從屯

者以木鐸徇於市朝注徵令有常者謂田狩及正月命

修封疆二月命雷且發聲音義

朝直遙反下同疏

釋曰云凡四時徵令有常

者鄉師各於其鄉內以木鐸警戒巡於市朝使民知之
注釋曰徵令有常者謂田狩春蒐夏苗秋獮冬狩四時
田獵獨言狩者略舉冬言之云及正月命脩封疆者案
月令孟春之月命脩封疆謂田之界分也云二月命雷
且發聲者案月令仲春之月先雷三日奮木鐸以令兆
民曰雷將發聲有不戒其容止者生子不備必有凶災

言此等政令皆有常時故引之以證徵令有常者也

以歲時巡國及野而調萬民

之難阨以王命施惠注歲時者隨其事之時不必四時

也難阨饑乏也鄭司農云調讀為周急之周音義

難古
艱字

本亦疏

釋曰以歲之困阨之時鄉師巡於國及至野外作艱調給萬民之有難阨者云以王命施惠者言於

其時以王命施布恩惠於下民也注釋曰言歲時者隨其事之時不必四時也者鄭知不是四時者以其難阨

是非常之事故不得為四時解之鄭司農云調讀為周急之周者讀從論語周急不繼富之周

歲終則

攷六鄉之治以詔廢置疏

釋曰云歲終者謂周之季冬云則攷六鄉之治者謂鄉師

責其治政文書考其功過云以詔廢置者有功則置之有過則廢之詔告也告王與冢宰廢置之

正歲

稽其鄉器比共吉凶二服閭共祭器族共喪器黨共射器州共賓器鄉共吉凶禮樂之器注吉服者祭服也凶服者弔服也比長主集為之祭器者簠簋鼎俎之屬閭胥主集為之喪器者夷槃素俎楬豆軼軸之屬族師主集為之此三者民所以相共也射器者弓矢楅中之屬黨正主集為之為州長或時射於此黨也賓器者尊俎笙瑟之屬州長主集為之為鄉大夫或時賓賢能於此州也吉器若閭祭器者也凶器若族喪器者也禮樂之

器若州黨賓射之器者鄉大夫備集此四者為州黨族

閭有故而不共也此鄉器者旁使相共則民無廢事上

下相補則禮行而教成音義

楊若瞻反輶九勇反軸音逐福音福又音逼

疏

釋曰正歲稽鄉器者此一句與下為總目正歲謂建寅之月稽考也鄉師各自考校當鄉之器服云比共吉凶二服者五家為比比長一人主集合五家相共吉凶二服云閭共祭器者二十五家為閭閭胥一人主集合祭器使相共云族共喪器者百家為族族師一人主集合喪器使相共云黨共射器者五百家為黨黨正一人主集合射器以共州長之射云州共賓器者二千五百家為州州長一人主集合賓器以共鄉大夫行鄉飲酒之禮云鄉共吉凶禮樂之器者萬二千五百家為鄉鄉大夫主集此四器恐州黨已下有故不能自共即旁相共

也注釋曰云吉服者祭服也者當比內無祭事其於族祭酺黨祭崇州祭社之等無過用朝服又知凶服是弔服者若人衰裳是常服主人自共其弔服是暫服可以相共故知是弔服其庶人弔服無過素冠與深衣而已云比長主集為之者雖五家之內亦當有官首若非比長主集民不自課故知比長主集為之云祭器者簋簠者案特牲同姓用簋少牢皆用敦同姓者乃用簋今言簋者況義耳云喪器者夷槃者案喪大記士併瓦盤大夫乃用夷盤今庶人實不得用夷盤引之者以況喪器非謂庶人得用夷盤也云素俎楬豆者案士喪禮小斂有素俎大斂有楬豆兩籩無滕此不言籩無滕者文略也云軼軸之屬者案既夕禮士朝廟用軼軸以載柩此庶人無軼軸引之者亦以況義知非族內有大夫士得用夷盤軼軸者以其大夫自有祿位不在共限故知引以況義不言棺槨亦主人自共之也故閭師云不樹者無槨此三者並是罰物所為知者案載師職云宅不毛

者有里布田不耕者有屋粟鄭玄云罰之以共吉凶二服及喪器鄭不云祭器文略有祭器可知鄭知必用罰物不用官物為之者以其不為官事明不用官物可知云射器者弓矢楅中之屬者案鄉射大射皆云執長弓挾乘矢楅在中射訖命弟子取矢置于楅中以八算置于中士則鹿中之等是也云之屬者之屬中容有侯乏等云為州長或時射于此黨也者一州管五黨州長春秋二時射於序學要在一黨之中故云或時射於此黨又云賓器者尊俎笙瑟之屬者案鄉飲酒三年貢士之時行飲酒之禮即有酒尊俎賓二人鼓瑟在堂笙八在於堂下故言尊俎笙瑟言之屬者更有籩豆之等云為鄉大夫或時賓賢能於此州也者一鄉管五州鄉大夫行鄉飲酒之時必在一州之內此州則共之故云或時賓賢能於此州也云吉器若閭祭器者也凶器若族喪器者也者以其鄉大夫備集此四器恐閭族已下有故不得自共故知還是閭族黨州所當共者也故云吉器

若閭祭器者也。山器若族喪器者也。云禮樂之器若州黨賓射之器者連州黨并言之者以其州黨射器賓器二者皆有禮器樂器故州黨并言之。自射器已下皆為國行禮得官物所為不出民物故酒正云凡為公酒者亦如之。注云謂鄉射飲酒以公事作酒者亦以式法及酒材授之使自釀之。酒材尚得公物明此器等亦出官物可知。以其為官行禮故也。云上下相補者自比共吉凶二服至州共賓器已上是下之相補鄉共吉凶禮樂之器者是上之相補故云上下相補云。禮行而教成者庶民之於財物闕於禮義教化不成今以器服共之即禮行而教成也。

若國大比則攷教察辭稽器展事以詔誅賞注

考教視賢能以知道藝與不察辭視吏言事知其情實

不展猶整具疏

釋曰若國大比者謂三年大比之時則鄉師考教學之官知其道藝進不云察

辭者視官中之吏辭之虛實云稽器者謂考鄉中禮樂兵器之等云展事者謂行事展省視之知其善惡詔告之在上善者賞之惡者誅之

鄉大夫之職各掌其鄉之政教禁令注鄭司農云萬二

千五百家為鄉疏

釋曰六鄉大夫各掌其鄉之政令及十二教與五禁疏令皆掌之注釋曰

案上丈五州為鄉故知萬二千五百家為鄉

正月之吉受教灋于司徒退而

頒之于其鄉吏使各以教其所治以攷其德行察其道

藝注其鄉吏州長以下音義

治直吏反下考治下治所治處同行下孟反下及注

德行之行疏釋曰言正月之吉者謂建子之月月朔之六行皆同日云受灋於司徒者謂若大司徒職十二

教已下其灋皆受於司徒而來云退而頒之于其鄉吏者謂已於司徒受得教灋遂分與州長已下至比長云使各以教其所治者亦謂州長已下至比長各教所治也云攷其德行者謂鄉大夫以鄉三物教萬民遂考校其萬民有六德六行之賢者云察其道藝者謂萬民之中有六藝者並擬賓之注釋曰以其比長以上至州長皆屬鄉大夫故知鄉

史州長以下至比長

以歲時登其夫家之衆寡辨其可

任者國中自七尺以及六十野自六尺以及六十有五

皆征之其舍者國中貴者賢者能者服公事者老者疾者皆舍以歲時入其書注登成也定也國中城郭中也晚賦稅而早免之以其所居復多役少野早賦稅而晚

免之以其復少役多鄭司農云征之者給公上事也舍者謂有復除舍不收役事也貴者謂若今宗室及關内侯皆復也服公事者謂若今更有復除也老者謂若今八十九十復羨卒也疾者謂若今廢不可事者復之玄

謂入其書者言於大司徒音義

復音福下同

疏

釋曰云以歲時者謂歲之

四時登猶成也定也夫家謂男女謂四時成定其男女多少云辨其可任者謂分辨其可任使者云國中自七尺以及六十者七尺謂年二十知者案韓詩外傳二十行役與此國中七尺同則知七尺謂年二十云野自六尺以及六十有五者六尺謂年十五故論語云可以託六尺之孤鄭注云六尺之孤年十五已下彼六尺亦謂

十五鄭言已下者正謂十四已下亦可以寄託非謂六尺可通十四已下鄭必知六尺年十五者以其國中七尺為二十對六十野云六尺對六十五晚校五年明知六尺與七尺早校五年故以六尺為十五也云皆征之者所征稅者謂築作挽引道渠之役及口率出泉若田獵五十則免是以祭義云五十不為甸徒若征伐六十乃免是以王制云六十不與服戎彼二者並不辨國中及野外之別云其舍者謂不給繇役則國中貴者已下是也云以歲時入其書者此上所云皆歲之四時具作文書入於大司徒故云歲時入其書也注釋曰云登成也定也者以其夫家衆寡若不作文書則多少齒歲不定若作文書多少成定故云登成也定也云國中城郭中也者以其對野故知國中是城郭中也云晚賦稅而早免之者以其經云七尺及六十對野中六尺至六十五是其晚賦稅而早免之云以其所居復多役少者以此經云國中貴者至疾者皆舍據國中而言是其國中

復多役少也鄭司農云四事皆若今者並舉漢法況之
玄謂入其書者言於大司徒知者以其上云受法於司
徒故知入其書三年則大比攷其德行道藝而興賢者
者言於大司徒

能者鄉老及鄉大夫帥其吏與其衆寡以禮禮賓之注

賢者有德行者能者有道藝者衆寡謂鄉人之善者無

多少也鄭司農云興賢者謂若今舉孝廉興能者謂若

今舉茂才賓敬也敬所舉賢者能者玄謂變舉言興者

謂合衆而尊寵之以鄉飲酒之禮禮而賓之疏

釋曰三年一閏

天道小成則大業比當鄉之內云考其德行道藝者德
行謂六德六行道藝謂六藝云而興賢者則德行之人

也能者則道藝之人也云鄉老及鄉大夫帥其吏者謂州長以下云與其衆寡者謂鄉中有賢者皆集在庠學云以禮禮賓之者以用也用鄉飲酒之禮以禮賢者能者賓客舉之注釋曰云賢者有德行者欲見賢與德行為一在身為德施之為行內外兼備即為賢者也云能者有道藝者鄭亦見道藝與能為一上注云能者政令行其身有道藝則政教可行是能者也云衆寡謂鄉人之善者無多少也者衆鄉飲酒堂上堂下皆有衆賓不言其數此經衆寡兩言無問多少皆來觀禮故云無多少也鄭司農云若今舉孝廉及茂才者孝悌廉潔人之德行故以孝廉況賢者茂才則秀才也才人之技藝故以況能者也玄謂變舉言與者衆禮記文王世子云或以事舉或以言揚故今貢人皆稱舉今變舉言與云謂合衆而尊寵之者合衆即此經云鄉老及鄉大夫已下是也云鄉飲酒之禮者則儀禮篇飲酒賓舉之法是也

厥明鄉老及鄉大夫羣吏

獻賢能之書于王王再拜受之登于天府內史貳之注
厥其也其賓之明日也獻猶進也王拜受之重得賢者

王上其書於天府天府掌祖廟之寶藏者內史副寫其

書者當詔王爵祿之音義

上時掌反疏釋曰厥明者藏才浪反謂今日行鄉

飲酒之禮也至其明日表奏於王注釋曰云天府掌祖廟之寶藏者是春官天府職文也引之者欲見天府掌寶物賢能之書亦是寶物故藏於天府云內史副寫其書者貳副也內史副寫一通文書擬授爵祿案內史職有策命諸侯羣臣之事故使內史貳之退而以鄉射之禮五物詢衆庶一

曰和二曰容三曰主皮四曰和容五曰興舞注以用也

行鄉射之禮而以五物詢於衆民鄭司農云詢謀也問
於衆庶寧復有賢能者和謂閨門之內行也容謂容貌
也主皮謂善射射所以觀士也故書舞為無杜子春讀
和容為和頌謂能為樂也無讀為舞謂能為六舞玄謂
和載六德容包六行也庶民無射禮因田獵分禽則有
主皮主皮者張皮射之無侯也主皮和容興舞則六藝
之射與禮樂與當射之時民必觀焉因詢之也孔子射
於矍相之圃蓋觀者如堵牆射至於司馬使子路執弓

矢出誓射者又使公罔之裘序點揚觶而語詢衆庶之

儀若是乎音義

復扶又反下猶復同射食亦反與音餘
矍俱縛反本或作瞿音同相息亮反堵

丁古反解
支鼓反

疏

釋曰言退者謂獻賢能之書於王退來鄉
內云以鄉射之禮者州長春秋二時習射

於序名為鄉射今鄉大夫還用此鄉射之禮云五物詢
衆庶者物事也一日二曰己下是也注釋曰行鄉射之

禮者案今儀禮鄉射云豫則鉤楹內堂則由楹外又云
序則物當棟堂則物當楹堂謂鄉學據鄉大夫所行射

禮也豫謂州長春秋二時習射於序司農云和謂閨門
之內行也者以其父子主和故和謂閨門之內行也云

容謂容貌也者以其容是容儀故知容貌也後鄭不從
此義杜子春讀和容為和頌謂能為樂也者與舞即舞

樂今又以和容謂能為樂故後鄭亦不從玄謂和載六
德容包六行也者破司農子春之義案大司徒以鄉三

物教萬民教成則興之明此詢者還是三物之內不是
三物之外別有和容又且主皮與舞是六藝之內明此
和容是六德六行之中在下謂之載和在六德之下故
云和載六德云容包六行者在上謂之包容則孝也孝
在六行之上故云容包六行必知容得為孝者案漢書
高堂生善為容容則禮也善為孝者必合於禮之容儀
故以孝為容者也云庶民無射禮者天子至士有大射
燕射賓射之等庶人則無此射禮故云無射禮也云因
田獵分禽則有主皮者案大司馬職大獸公之小禽私
之者至舍更與在田之人射則取之則有主皮云主皮
者張皮射之無侯也者自士已上張皮侯采侯獸侯庶
人主射此皮故云主皮無侯也云主皮和容與舞則六
藝之射與禮樂與者以此三者當之故以主皮當射和
容當禮與舞當樂若然三物之中其事一十有八今六
德之中唯問和六行之中唯問容六藝之中唯問禮樂
獨問此者既貢賢於王其餘則未能盡備故略舉五者

以問之六德是其大者故問下之和者六行是其小者故問上之孝者也六藝之中禮以安上治民樂以移風易俗男子生設弧於門左射則是男子之事此皆人行之急故特言之自餘略而不說又云當射之時民必觀焉因詢之也者案鄉射記唯君有射于國中其餘則否注云臣不習武事於君側以其鄉射在城外衆庶皆觀焉故得詢此五物云孔子射於矍相之圃已下者此是禮記射義文天子諸侯射先行燕禮卿大夫士射先行鄉飲酒之禮時孔子為鄉大夫鄉射之禮先行飲酒禮故云孔子射於矍相之圃矍相地名以其臣不得在國射故射於矍相之圃蓋觀者如堵墻者以其鄉內衆庶皆集在射所故云觀者如堵墻云射至於司馬者以其飲酒之禮必立司正於將射變司正為司馬也案鄉射大射司射執弓矢今此云子路執弓矢則子路為司射也云子路出誓者以其衆庶多不可盡與之射故誓去之云又使公問之喪序黜揚解而語者案鄉飲酒之禮

一人舉觶為旅酬始二人舉觶為無算爵始射在無算爵前今誓在無算爵後者但射實在無算爵前今未射之前用此無算爵禮二人舉觶之法以誓衆庶耳非謂此射在無算爵後云詢衆庶之儀若是乎者孔子為諸侯鄉大夫此經是天子鄉大夫引彼以證此故云乎以疑之此謂使民興賢出使長

之使民興能入使治之注言是乃所謂使民自舉賢者因出之而使之長民教以德行道藝於外也使民自舉能者因入之而使之治民之貢賦田役之事於內也言為政以順民為本也書曰天聰明自我民聰明天明威自我民明威老子曰聖人無常心以百姓心為心如是

則古今未有遺民而可為治疏

釋曰言此謂使民興賢者謂上經賓舉者皆民

中舉之還使治民故云此謂使民興賢出使長之謂使鄉外與民為君長云使民興能入使治之者謂能者復來入鄉中治民之貢賦注釋曰云使民自舉賢者因出之而使之長民教以德行道藝於外也者以賢者德大故遣出外或為鄰鄙之主或諸侯皆可也以其自有德行道藝故還使之教民以德行道藝云使民自舉能者因入之而使之治民之貢賦田役之事於內也者以其能者德小不可以為大夫諸侯等故還入鄉中量德大小以為比長鄰長已上之官治民之貢賦田役於內也云言為政以順民為本也者禮記云上酌民言則下天上施上不酌民言則下不天上施故言為政以順民為本也書曰天聰明已下是尚書咎繇篇之文也自用也言天雖聰明視聽既遠不自用已之聰明用民之聰明民之歸者則授之以天位謂若湯武是也天明威自我

民明威者威畏也天雖明察可畏不自用已之明威用我民明威民所叛者則討之謂若桀紂是也云老子曰聖人無常心以百姓心為心者但聖人形如枯木心若死灰空洞無我故無常心以百姓之心為心引之者證順民為本之意云如是則古今未有遺民而可為治者天聰明是古老子與此文為今皆順民為治故云古今未有遺民而可為治也

歲終則令六鄉之吏皆會政致事注會計

也致事言其歲盡文書疏

釋曰年終將考其得失則令六鄉之吏州長之官皆計會

教政之功狀致其所掌之事於鄉大夫鄉大夫得之致與大司徒然後考之

正歲令羣吏攷

法于司徒以退各憲之於其所治疏

釋曰正歲建寅之月鄉大夫令州長

已下羣吏令使考法於司徒攷謂受而考量行之故云以退各憲之於其所治憲者表縣之也國大詢于

衆庶則各帥其鄉之衆寡而致於朝注大詢者詢國危

詢國遷詢立君鄭司農云大詢于衆庶洪範所謂謀及

庶民疏

釋曰國有大事必順於民心故與衆庶詢謀則六鄉大夫各帥其鄉之衆寡而致於朝謂外朝

三槐九棘之所共詢謀之注釋曰知大詢詢國危詢國遷詢立君者案小司寇職云掌外朝之政以致萬民而詢焉一曰詢國危二曰詢國遷三曰詢立君此經云大詢于衆庶而致于朝故知大詢者詢國危之等也此三者皆是國之大事故稱大詢小司寇雖不云大太卜云大貞即此詢國危之等也鄭司農云大詢于衆庶引洪範所謂謀及庶民者彼謀及庶民即大詢於衆庶一也故引為證

國有大故則令民各

守其閭以待政令注使民皆聚於閭胥所治處疏


釋曰大故

謂災變寇戎之等警急須人故鄉大夫令州長已下使民各守其閭胥所治處以待國之政令注釋曰二十五

家為閭中士為閭胥則有治政之處以聚其民以旌節輔令則達之注釋曰民雖以

徵令行其將之者無節則不得通疏釋曰國有大事故

徵令出入來往皆須得旌節輔此徵令文書乃得通達使過故鄭云民雖以徵令行其將之者無節則不得通



周禮注疏卷十一

周禮注疏卷十一考證

小司徒之職疏黨祭崇族祭酺○監本崇訛宗酺訛步

今俱考經文改正

凡用衆庶疏又聽斷其賞罰○經文云聽其辭訟施其
賞罰此處疑有脫字

乃經土地而井牧其田野注甸之言乘也讀如衷甸之

甸○

臣浩

按朱子曰甸乘古人原是一音如陳之後

為田姓是也可以相證

疏公邑無名故借三等之號以表之○借監本作釐
查字書無釐字今改正

凡民訟以地比正之○此節疏各本錯在下節今依經
文之次訂正

鄉師之職及期以司徒之大旗致衆庶疏鄉師既是大
夫官○監本鄉訛卿又脫師字今改正

正歲稽其鄉器疏無過用朝服○朝當作祭

又士則鹿中之等○士監本訛作上今据鄉射禮文

士則鹿中改正

鄉大夫之職三年則大比注元謂變舉言興者○言監
本訛作賢今改正

退而以鄉射之禮疏卿大夫士射先行鄉飲酒之禮○

卿監本訛鄉今攷射義文正之

正歲令羣吏攷灋于司徒以退各憲之於其所治○
臣

人龍按各本所治下俱有之國二字蓋由石經誤衍

一之字後人寫刻以石經為定本遂割下節國大詢

于衆庶之國字以從之而不覺反為所誤也今見石
刻之國二字刊缺監本直去此二字而下節之首未
增國字但作大詢於衆庶亦誤也

疏一曰詢國危二曰詢國遷三曰詢立君○曰詢國
遷二句監本訛作以安庶民四字今据小司寇職文
訂正

周禮注疏卷十一考證

欽定四庫全書

經部

周禮注疏卷十三

詳校官監察御史_臣祝德麟

刑部郎中_臣許兆椿覆勘

覆校官庶吉士_臣侍朝

校對官助教_臣汪錫魁

謄錄監生_臣梁如棟

欽定四庫全書

周禮注疏卷十二

漢鄭氏注 唐陸德明音義 賈公彥疏

州長各掌其州之教治政令之法注鄭司農云二千五

百家為州論語曰雖州里行乎哉春秋傳曰鄉取一人

焉以歸謂之夏州疏釋曰一鄉管五州中大夫一人為

教謂十二教云治政令之法者謂十二教之外所施政

令皆治之注釋曰二千五百家為州者雖無正文約則

有之案上文五家為此五此為閭四閭為族五族為黨

周禮注疏

左氏宣公十一年傳曰楚子伐陳遂入陳殺夏徵舒因縣陳中叔時諫乃復封陳鄉取一人焉以歸謂之夏州注云言取討夏徵舒之州引此者以證有州之義也正月之吉各屬其州之民而

讀法以攷其德行道藝而勸之以糾其過惡而戒之注

屬猶合也聚也因聚衆而勸戒之者欲其善音義

屬音燭注

下皆疏釋曰謂建子之月一日也各屬其州之民者屬同疏猶合也聚也謂合聚一州之民也而讀法者謂對衆讀一年政令及十二教之法使知之云以考其德行道藝而勸之者謂考量民之六德六行及六藝之道藝而勸勉之使之勤修云以糾其過惡而戒之者民有過惡糾察與之罰而懲戒之注釋曰言因聚衆而勸戒之者謂欲勸戒之必須聚衆故言因聚衆而勸戒之欲其善也若以歲時祭祀州社則

屬其民而讀法亦如之春秋以禮會民而射于州序注

序州黨之學也會民而射所以正其志也射義曰射之

為言繹也繹者各繹己之志音義會如字疏釋曰上云

注同歲時皆謂

歲之四時此云歲時唯有歲之二時春秋耳春祭社以

祈膏雨望五穀豐熟秋祭社者以百穀豐稔所以報功

故云祭祀州社也云則屬其民而讀法亦如之者凡讀

法皆因節會以聚民今既祭因聚民而讀法故云亦如

之云春秋以禮會民而射于州序者州長因春秋二時

皆以禮會聚其民而行射禮于州之序學中言以禮者

亦謂先行鄉飲酒之禮乃射故云以禮也注釋曰此知

序州黨學者案下黨正亦云飲酒于序故知州黨學同

名為序若鄉則立庠故禮記鄉飲酒義云主人迎賓于

庠門之外彼鄉大夫行賓賢能非州長黨正所行故知

庠則鄉學也云會民而射所以正其志也者凡禮射皆須存其志意故鄭即引射義曰射之為言繹也繹者各繹己之志繹陳也言各陳己志者謂若射凡州之大祭義云射者內志正外體直乃能中之是也

祀大喪皆泣其事注大祭祀謂州社稷也大喪鄉老鄉

大夫於是卒者也泣臨也疏釋曰云凡者以其大祭大

春秋祭祀大喪者則非國家祭祀喪事謂州之大祭唯有

其事者二者州長皆臨其事也注釋曰言大祭祀謂州

社稷者以生文云歲時祭祀州社此經又因言州之大

祭祀故知還是上文州社也知有稷者以其天子諸侯三社皆稷對之故知兼有稷也言州社者若言大社國社之類又對黨祭崇族祭酺故此特言州社也云大喪鄉老鄉大夫者以其遠郊之內置六鄉鄉老與鄉大夫

死不出六鄉要在鄉一州一黨一族
一閭之內今據州而言故云於是卒者
若國作民而師
田行役之事則帥而致之掌其戒令與其賞罰注致之
致之於司徒也掌其戒令賞罰則是於軍因為師帥疏
釋曰言若者不定之辭若如也如有國家作起其民師
謂征伐田謂田獵行謂巡狩役謂役作此數事者皆須
徵聚其民州長則各帥其民而致之於司徒也云掌其
戒令與其賞罰者州長既致其民還自領已民為師帥
故還使州長掌之也注釋曰云致之於司徒也者謂州
長致與小司徒小司徒乃帥而致與大司徒故小司徒
職云大軍旅帥其衆庶是也云因為師帥者若衆屬軍
吏別有軍吏掌之何得還自掌之故知因為師帥也但
在鄉為州長已管其民在軍還領已
民為師帥即是因內政寄軍令也
歲終則會其州之

政令正歲則讀教法如初注雖以正月讀之至正歲猶

復讀之因此四時之正重申之音義

重直疏釋曰既不

終周禮之內直言歲終者皆是周之歲終也言則會其州之政令者謂會計當州黨正已下政令文書將以考課也云正歲則讀教法如初者以其建寅之月得四時之正於教令審故又讀教法言如初者亦當屬民讀之也

三年大比則大致州里以贊鄉大夫廢興注廢興所

廢退所興進也鄭司農云贊助也疏

釋曰州長至三年大案比之日則大

考州里者謂年年考訖至三年則大考之言大者時有黜陟廢興故也

黨正各掌其黨之政令教治注鄭司農云五百家為黨

論語曰孔子於鄉黨又曰闕黨童子音義

治直吏反族師治令同

疏

釋曰言各者一鄉有二十五黨故各掌其黨之政令及十二教與治職文書注釋曰先鄭知五百家為黨

者以其五家為此五此為閭四閭為族五族為黨故知也引論語者證有黨義也

及四時之孟

月吉日則屬民而讀邦法以糾戒之注以四孟之月朔

日讀法者彌親民者於教亦彌數音義

數所反疏釋曰及

正四時孟月吉日則屬民而讀邦法者因糾戒之如州長之為也注釋曰云以四孟之月朔日讀法者彌親民

者於教亦彌數者上文州長唯有建子建寅及春秋祭社四度讀法此黨正四孟及下文春秋祭崇并正歲一

年七度讀法者以其鄉大夫管五州去民遠不讀法州長管五黨去民漸親故四讀法黨正去民彌親故七讀

法鄭云彌親民者則非直徒解黨正而已案下族師十
四度讀法彌多於此故鄭總釋云彌親民者於教亦彌
數也春秋祭崇亦如之注崇謂雩崇水旱之神蓋亦為壇

位如祭社稷云音義

崇崇敬反

疏

釋曰黨正不得與州同祭社故亦春秋祭崇神也注

釋曰鄭知崇謂雩崇水旱之神者案禮記祭法云雩崇祭水旱案昭公元年左氏傳子產云水旱癘疫之不時於是乎崇之皆是崇祭水旱神也云蓋亦為壇位如祭社稷云者以其大司徒及封人等皆云社稷有壇又祭法王宮祭日及雩崇祭水旱等皆是壇名故知亦如社稷有壇位無正文故言云以疑之也

國索鬼

神而祭祀則以禮屬民而飲酒于序以正齒位一命齒

于鄉里再命齒于父族三命而不齒注國索鬼神而祭

祀謂歲十二月大蜡之時建亥之月也正齒位者鄉飲酒義所謂六十者坐五十者立侍六十者三豆七十者四豆八十者五豆九十者六豆是也必正之者為民三時務農將闕於禮至此農隙而教之尊長養老見孝悌之道也黨正飲酒禮亡以此事屬於鄉飲酒之義微失少矣凡射飲酒此鄉民雖為卿大夫必來觀禮鄉飲酒鄉射記大夫樂作不入士既旅不入是也齒于鄉里者以年與衆賓相次也齒于父族者父族有為賓者以年

與之相次異姓雖有老者居於其上不齒者席于尊東

所謂遵音義

蜡仕詐反依字作稽為于偽反隙疏釋曰去逆反本又作邵弟音悌下同黨正

行正齒位之禮在十二月建亥之月為之非蜡祭之禮而此云國索鬼神而祭祀者以其正齒位禮在蜡月故言之以為節耳當國索鬼神而祭祀之時則黨正屬聚其民而飲酒于序學中以行正齒位之法當正齒位之時民內有為一命已上必來觀禮故須言其坐之處云一命齒于鄉里者此黨正是天子之國黨正則一命亦天子之臣若有一命之人來者即于堂下鄉里之中為齒也云再命齒于父族者謂父族為賓即與之為齒年大在賓東年小在賓西三命而不齒者若有三命之人來者縱令父族為賓亦不與之齒若非父族是異姓為賓灼然不齒位在賓東故云不齒也若然典命雖不見天子之士命數序官有上士中士下士則上士三命中

士二命下士一命則此一命謂下士再命謂中士三命謂上士也注釋曰云國索鬼神而祭祀謂歲十二月大蜡之時是禮記郊特牲文建亥之月者是鄭君解義語言此者謂行正齒位之禮亦在此月也云正齒位者鄉飲酒義所謂六十者坐至六豆者竝是彼文案彼文謂五十者立侍六十者乃於堂上而坐禮年六十以上邊豆有加故不得邊豆耦而云六十者三豆七十者四豆八十者五豆九十者六豆若然則堂下五十立者二豆而已引之者證此經與彼同是正齒位之法也云必正之者為民三時務農將闕於禮至此農隙而教之尊長養老見孝弟之道也者春夏秋三時務在田野闕於齒序之節隙間也至此十月農事且閒而教之言尊長養老即五十已上至九十正齒位是也但孝弟施于家內令行尊長養老則是孝弟之道通達于外者也云黨正飲酒禮亡者儀禮篇卷竝在之日別有黨正飲酒之禮見今十七篇內無黨正飲酒之禮故云亡也云以此事

屬于鄉飲酒之義微失少矣者但儀禮未亡之時篇內
論正齒位之禮其義具悉今將此經之事連屬於鄉飲
酒義則鄉飲酒義唯有五十已上豆數之言此經唯有
一命已下觀禮之事二處相兼比於儀禮篇中鄉飲酒
法義理乃未足微失於少故云微失少矣云凡射飲酒
者謂州長春秋行社黨正十二月行飲酒二事俱同故
兼言射也云此鄉民雖為卿大夫必來觀禮者證此經
一命以至三命齒與不齒之人來在位之法也又引鄉
飲酒鄉射記者證二事俱有一命已下觀禮來入時節
案彼經卿大夫皆作樂前入士未旅前入故云大夫樂
作不入鄭彼注云後樂賢也云士既旅不入注云後正
禮也若然大夫士來觀禮者皆為樂賢行禮而至故大
夫樂作不入士既旅不入也云齒于鄉里者以年與衆
賓相次也者位在堂下與五十已下衆賢賓客相次以
其一命若據天子之國一命為下士若據諸侯之國一
命為公侯伯之士若據子男之士不命固在堂下以其

士立于下故也云齒于父族者父族有為賓者以年與之相次者以其賓在戶牖之間南面若賓是同姓父族則與之齒也云異姓雖有老者居於其上者既言齒于父族明異姓非父族不齒可知云不齒者席于尊東所謂尊者案鄉飲酒鄉射皆酒尊在室戶東房戶西賓主夾之鄉人為卿大夫來觀禮為鄉人所遵法謂之為遵席位在酒尊東公三重大夫再重故知不齒者席于尊東也云所謂尊者所謂鄉射鄉飲酒之遵也案鄭注鄉飲酒云此篇無正齒位之事焉者彼是三年一貢士直行飲酒之禮賢者為賓其次為介其次又為眾賓賓而貢之如此無黨正正齒位之事案彼注又云天子之國三命者不齒於諸侯之國爵為大夫則不齒矣者以其賓賢能年歲必小於卿大夫等是以天子之國三命士及公侯伯之卿三命大夫二命子男之卿再命大夫一命但是大夫已上無問命數皆不齒以其大夫已上爵尊故也但諸侯之卿當天子之上士故天子之國三命

乃不齒天子士再命以下及諸侯之士則皆齒以其士卑立于下故在堂下與鄉人立者齒也彼是賓賢能禮若黨正飲酒之禮則此文是天子黨正飲酒法則一命齒于鄉里在堂下與鄉人齒再命齒于父族父族為賓在堂上則天子再命之士亦在堂上與彼賓賢能鄉飲酒義異者案鄉射記云大夫與則公士為賓則此黨正飲酒有一命以上觀禮則亦以公士為賓但公家之士其年必大故天子之士再命者亦與之齒若然賓賢能天子之士再命不齒者彼賓賢能非正齒位法別為一禮故與黨正正齒位禮異也

凡其黨之祭

祀喪紀昏冠飲酒教其禮事掌其戒禁注其黨之民音

義

冠古疏

釋曰

此一經竝是民之所行與上州之祭祀

亂反疏大喪義異此祭祀已下雖是民之所行民者冥也非教不可故黨正皆教其禮事也因掌其戒命督禁之注釋曰經云凡其黨之祭祀之等言凡是廣及之

言故云其凡作民而師田行役則以其法治其政事注

亦於軍因為旅帥疏

注釋曰此亦如上釋非衆屬軍吏者黨正在鄉各管五百家出軍之

時家出一人則五百人為旅黨正還為旅帥亦如州長因為師帥也

歲終則會其黨政帥

其吏而致事疏

釋曰黨正以一黨之內有族師以下諸官等故歲終則會計一黨政治功狀則

帥其族師以下之吏致其所掌之事於州長州長又致與鄉大夫鄉大夫致與大司徒而行賞罰也正歲

屬民讀法而書其德行道藝注釋曰書記之疏

於正歲建寅

朔日聚衆庶讀法因即書其德行道藝鄭解書書記之者以其三年乃一貢今每年正歲皆書記勸勉之三年即貢也以歲時涖校比注涖臨也鄭司農云校比族師職

所謂以時屬民而校登其族之夫家衆寡辨其貴賤老

幼廢疾可任者及其六畜車輦如今小案比疏

釋曰案族師職

以歲之四時校比此黨正管五族至校比之時黨正往臨之恐其有差失故也注釋曰鄭司農所云者竝族師職文以其黨正所臨臨族師故還引族師校比之法以證成其義也云如今小案比者此舉漢法言小案比對三年大比及大比亦如之疏

釋曰及至也族師至三年大案比黨正亦蒞之

族師各掌其族之戒令政事月吉則屬民而讀邦法書

其孝弟睦婣有學者注政事邦政之事鄭司農云百家

為族月吉每月朔日也故書上句或無事字杜子春云

當為正月吉書亦或為戒令政事月吉則屬民而讀邦

法疏

釋曰云各掌其族之戒令政事以其族師主百家各自受法於上而掌其族戒令政事也此族師亦

聚衆庶而讀法因書其孝弟睦姻惟據六行之四事有學德行道藝具言此云孝弟睦姻惟據六行之四事有學即六藝也計族師所書亦應不異黨正但文有詳畧故所言有異但族師親民故析別而言耳注釋曰云政事邦政之事者謂國之征役皆是先鄭云百家為族者亦約五家為比五比為閭四閭為族故知族百家也云月吉每月朔日也者以其彌親民教亦彌數故十二月朔皆讀之云故書上句或無事字者則月與上政字連政又為正字故杜子春云當為正月吉旦族師親民讀法宜數若為正月之吉則與黨正同於義不可云書亦或為戒令政事月吉則屬民而讀邦法者此義還春秋祭酺與經同於義為得後鄭從之故引之在下也

亦如之注酺者為人物裁害之神也故書酺或為步杜
子春云當為酺玄謂校人職又有冬祭馬步則未知此
世所云蠲螟之酺與人鬼之步與蓋亦為壇位如雩禱

云族長無飲酒之禮因祭酺而與其民以長幼相獻酬

焉音義

酺音步或音蒲校戶教反蠲悅全反螟寬經反與音餘下步與同禱禱敬反本亦作禱下黨禱

同

疏

釋曰族師於春秋祭祀酺神之時亦如上月朔讀法也注釋曰鄭知酺者為人物裁害之神者凡國

之祈祭者皆恐與人物為裁害謂若州長黨正所祭社禱亦為水旱與物為裁害明此亦是恐與人物為裁害之神也云故書酺或為步杜子春云當為酺者校人職云馬步亦為行步之字而子春破之從酺者子春亦無

正文直以此經今文為正故依之也玄謂校人職又有冬祭馬步者彼是與馬為害故祭之引之者證此酺亦與人物為害云則未知此世所為螻蟻之酺與人鬼之步與者以此經云酺不知何神故舉漢法以況之但漢時有螻蟻之酺神又有人鬼之步神未審此經酺定當何酺故兩言之以無正文故皆云與以疑之也云蓋亦為壇位如雩縈云者上黨祭雩縈鄭云蓋亦為壇位如祭社稷云已疑縈為壇位今此文約與雩縈同故言云以疑之云族長無飲酒之禮者案上州長春秋習射有飲酒禮黨正十月農功畢亦有飲酒禮皆得官物為之今此族卑不得官物為禮故云旅無飲酒禮也云因祭酺而與其民以長幼相獻酬焉者鄭必知因祭酺有民飲酒之禮者案禮記禮器云周旅酬六尸曾子曰周禮其猶酺與鄭注彼云合錢飲酒為酺旅酬相酌似之也即引明堂禮乃命國酺鄭據禮器明堂禮皆有以邦比酺法酺即合錢飲酒以不得官酒故須合錢耳以邦比

之法帥四閭之吏以時屬民而校登其族之夫家衆寡
辨其貴賤老幼廢疾可任者及其六畜車輦注登成也

定也疏

釋曰云以邦比之法者案比之法國家有常故據其常法以案比之故云以邦比之法也云帥

四閭之吏者族師管四閭閭胥皆中士又有二十比比長皆下士是帥四閭之吏也云以時屬民而校者謂屬聚其民而校比之也云登其族之夫家衆寡者夫家即男女也有夫有婦乃成家自二人以至十人為九等七六五者為其中若然則六口為中七口以上為衆五口已下為寡云辨其貴賤老幼者貴為卿大夫賤為占賣國之斥幣販易之人也廢疾謂廢於人事疾病若今癰不可事者也云可任者謂若國中七尺以及六十野自六尺以及六十五皆征之則可任者也及其六畜馬牛羊豕犬雞車駕牛馬輦人挽行皆辨之也

五家

為比十家為聯五人為伍十人為聯四閭為族八閭為聯使之相保相受刑罰慶賞相及相共以受邦職以役

國事以相葬埋注相共猶相救相賙音義

葬如字劉才郎反埋本或

作狸莫皆反

疏

釋曰云

五家為比十家為聯又云五人為伍十人為聯者在家惟有五家為比比長領之

無十家為聯相管之法今云十家為聯者以在軍之時有十人為什本出於在家故并二比為十家為聯擬入軍時相并故覆云五人為伍十人為聯明是在軍法耳云四閭為族八閭為聯者張逸問族百家安得有八閭鄭答并之為聯耳若然亦如二比為聯之類也云使之相保者謂相保不為愆負云相受者謂宅舍有故相受寄託云刑罰慶賞相及者案趙商問族師之義鄰比相坐康誥之說門內尚寬書禮是錯未達旨趣鄭答族師

之職周公新制禮使民相共勅之法康誥之時周法未定又新誅三監務在尚寬以安天下先後異時各有云為乃謂是錯注釋曰案大司徒職云五族為黨使之相救五黨為州使之相賙此所戒勅亦與彼同故引為證也

若作民而師田行役則合其卒伍簡其兵器以鼓鐸

旗物帥而至掌其治令戒禁刑罰注亦於軍因為卒長疏釋曰若作民而師田行役則合其卒伍者族師主百家釋曰若作民而師田行役則合其卒伍者族師主百亦因為卒長也云簡其兵器者在軍即有弓矢戈矛戈戟云以鼓鐸旗物者案大司馬春辨鼓鐸王執路鼓諸侯執賁鼓軍將執晉鼓師帥執提旅帥執鼙卒長執鐃兩司馬執鐸公司馬執鐃又司常云王建大常已下是鼓鐸旗物也帥而至者族師以士卒具備帥至於鄉師以致司徒也注釋曰亦於軍因為卒長者亦釋經掌其

治令已下亦非衆屬軍吏還是自為卒長者也歲終則會政致事

閭胥各掌其閭之徵令注鄭司農云二十五家為閭疏

注釋曰先鄭知二十五家為閭者以其五家為比五比為閭故知閭二十五家也而云各掌其閭之徵令者徵令即下文歲時以下之事是也以歲時各數其閭之衆寡辨其施舍凡

春秋之祭祀役政喪紀之數聚衆庶既比則讀法書其

敬敏任恤者注祭祀謂州社黨禋族酺也役田役也政

若州射黨飲酒也喪紀大喪之事也四者及比皆會聚

衆民因以讀法以勅戒之故書既為暨杜子春讀政為

征暨為既音義

數色主反政如字杜音征會如疏釋曰

歲時者謂歲之四時云各數其閭之衆寡者閭胥各自數當閭之內戶口多少云辨其施舍者亦謂國中七尺以及六十野自六尺以及六十有五皆征之已外施舍不役云凡春秋之祭祀役政喪紀之數聚衆庶者謂州長黨正族師祭祀及役政與王家喪紀閭胥皆為之聚衆庶以待驅使也云既比則讀法者上族師已上官尊讀法雖稀稠不同皆有時節此閭胥官卑而於民為近讀法無有時節但是聚衆庶比之時即讀法故云既比則讀法云書其敬敏任恤者以上書其德行道藝今此閭胥親民更近故除任恤六行之外兼記敬敏者也注釋曰知祭祀謂州社黨族酺者以其黨鄉之內所有祭祀無過此三者而已故知義然也云役田役也者上文師田行役竝言則役是役作但田是國之常事田重於功作此文不云田故知役是役是田役也知政是州射黨

飲酒者政與上祭祀連文聚衆庶故知若州射及黨飲酒也云喪紀大喪之事也者此大喪王之喪也知者以其聚衆庶明非上州之

大喪故以王之喪解之

凡事掌其比釐撻罰之事注釐

撻者失禮之罰也釐用酒其爵兕角為之撻扑也故書

或言釐撻之罰事杜子春云當言釐撻罰之事音義

古釐

橫反撻吐達疏釋曰言凡非一則是鄉飲酒及鄉射飲反扑普卜反

疏釋曰言凡非一則是鄉飲酒及鄉射飲

酒有失禮者須罰之故云凡事云掌其

比者人聚則有校比之法皆掌之云釐撻罰之事者凡有失禮者輕者以釐酒罰之重者以楚撻之故雙言釐

撻罰之事注釋曰鄭知釐用酒者以其古者失禮之罰

撻罰之事注釋曰鄭知釐用酒者以其古者失禮之罰

用酒又知其爵以兕角為之者見詩云兕觥其觶故

知用兕牛角為釐爵也云撻扑也尚書云扑作教刑孔

云扑榎楚故知此撻亦扑也

云故書或言釐撻之罰事

杜子春云當言黷撻罰之事者子春之意以
黷撻罰在之上於義為切故從經為正者也

比長各掌其比之治五家相受相和親有臯奇衰則相

及注衰猶惡也音義

治直吏反臯本作罪衰似嗟反

疏

釋曰比長管五家下士為

之家數雖少亦有治法故各掌其比之治云五家相受者宅舍有故崩壞相寄託云相和親者案尚書云爾室不睦爾唯和哉五家之內有不和親則使之自相和親云有臯奇衰則相及者五家有罪惡則連及欲使不犯故注云衰猶惡也徙于國中及郊則從而授之注徙謂不便其

居也或國中之民出徙郊或郊民入徙國中皆從而付

所處之吏明無罪惡音義

使婢面反

疏

釋曰五家之內人有不便其居須徙者則

使伍長從而授之法釋曰云徙謂不便其居也者古者三歲大比之年民有願厭於本居之處不便則任民遷徙故云不便其居也周法遠郊百里內并國中其為六鄉此國中及郊所徙者竝不離當鄉之內言或國中之民出徙郊者先從近向遠釋經徙于郊之文也云或郊民入徙國中者欲釋經徙于國中之文也云皆從而付所處之吏明無罪惡者釋經則從而授之文也若有罪惡則下文無授無節園土內之其人私逃有何付授之也今伍長自往付授明若徙于他則為之旌節而行無罪惡直是不便其居耳

之注徙於他謂出居異鄉也授之者有節乃達疏

釋曰上經

是當鄉之內遷徙直須伍長送付彼吏今此經言徙于他是出向外鄉則當為旌節乃行之注釋曰言徙于他對上經直言國中及郊為鄉內此言徙于他明是出居異鄉也云授之者有節乃達者鄭欲見上經鄉內徙者

有授無節此徒外鄉非直有授兼亦有節乃可行故若鄭言此有節亦授之者也此節即道路用旌節一也

無授無節則唯園土內之注鄉中無授出鄉無節過所

則呵問繫之園土考辟之也園土者獄城也獄必園者

規主仁以仁心求其情古之治獄閔於出之音義

呵呼何反

又音疏釋曰總結上二經故鄭云鄉中無授出鄉無節此皆罪人故當唯園土內之也注釋曰上釋出

鄉有授兼節此注釋鄉中無授出鄉無節似出鄉空有節而全無授者以其出鄉雖兼有授直舉有節以對鄉內有授何妨有節兼有授也若直有節而無授何以分別罪惡之人云過所則呵問繫之園土考辟之也者謂所過之官司見即呵問之必知有呵問之者若不呵問窮詰則虛實難明故知呵問也繫之園土考辟之者謂

繫在獄中辟法也考量以法推問無授無節之由也云
圜土者獄城也獄必圜者規主仁以仁心求其情者案
禮記深衣有規矩權衡規配東方仁矩配西方義但斷
獄之法有義有仁雖以義斷使合宜仍以仁恩閱念求
得情實閱念出之故獄城圜也

封人掌設王之社壝為畿封而樹之注壝謂壇及壝埽

也畿上有封若今時界矣不言稷者稷社之細也疏釋

云掌設王之社壝者謂王之三社三稷之壇及壇外四
邊之壝皆設置之直言壝不云壇舉外以見內內有壇
可知也云為畿封而樹之者謂王之國外四面五百里
各置畿限畿上皆為溝塹其土在外而為封又樹木而
為阻固故云為畿封而樹之注釋曰壝謂壇及壝埽也
者壝埽即壝經不言壇故鄭兼見之也云畿上有封若

今時界矣者漢時界上有封樹故舉以言之云不言稷者稷社之細也者案大司徒及下文皆社稷俱言此獨言社不言稷故解之案孝經緯社是五土總神稷是原隰之神原隰即是五土之一耳故云稷社之細舉社則稷從之矣故言社不言稷也稷既是原隰之神但原隰宜五穀五穀不可遍敬稷又為五穀之長故立稷以表名孝經注直云社謂后

凡封國設其社稷之壝封其四

疆注封國建諸侯立其國之封疏

釋曰言凡封國者封五等之國非一故云

凡以廣之云設其社稷之壝者案禹貢徐州貢五色土孔注云王者封五色土為社建諸侯則各割其方色土與之使立社燾以黃土苴以白茅茅取其潔黃取王者覆四方是封乎諸侯立社稷之法也云封其四疆者諸侯百里以上至五百里四邊皆有封疆而樹之故云封其四疆也注釋曰封國建諸侯者若典命云三公八命

其卿六命大夫四命其出封皆加一等是建諸侯也云立其國之封者封則經云四疆是也造都邑

之封域者亦如之疏

釋曰云造都邑者謂大都小都家邑三等采地有百里五十里二十

五里皆有四邊封域故云之封域也云亦如之者亦如上諸侯有四疆也

令社稷之職注將

祭之時令諸有職事於社稷者也郊特牲曰唯為社事

單出里唯為社田國人畢作唯為社丘乘共粢盛所以

報本反始也音義

為于偽反下同單音丹乘繩證反

疏

釋曰春秋祭社皆有職事令之

者使各依職司而行故須令之也注釋曰言將祭之時者春秋祭社日皆用甲未祭之前令諸有職事于社稷者也云唯為社事單出里者單盡也盡往助祭于州長此據六鄉之中又云唯為社田國人畢作者畢亦盡也

國人盡行鄭云非徒羨謂在六遂之中以下劑致甿當
家之內一人為正卒一人為羨卒其餘為餘夫但田與
追胥竭作餘夫亦行故云非徒羨也云唯為社丘乘共
築盛者此據三等采地之中故有丘甸井田之法案小
司徒職云九夫為井四井為邑四邑為丘四丘為甸甸
方八里旁加一里則為一成成百井九百夫一井之地
九夫八家各治一夫自入共治一夫稅入於君以共
盛而祭社故云丘乘共築盛也云所以報本反始也者
社稷為土神是民之本句龍后稷是民之始反亦報也
命民共之者所以報本反始也引之者證祭社各有職
事
凡祭祀飾其牛牲設其楅衡置其絳共其水橐注飾
謂刷治潔清之也鄭司農云楅衡所以楅持牛也絳著
牛鼻繩所以牽牛者今時謂之雉與古者名同皆謂夕

牲時也杜子春云福衡所以持牛令不得抵觸人玄謂

福設於角衡設於鼻如楸狀也水橐給殺時洗薦牲也

綏字當以豸為聲音義

福音福綏本又作紉持忍反橐古老反清如字又才性反著直

略反令力呈反抵丁禮反

楸

疏釋曰言凡祭祀謂王之天地宗廟先大次小之

祭祀非一故云凡以廣之云飾其牛牲者祭祀尚潔淨

故飾治使淨也設其福衡者恐抵觸人故須設福于角

牽時須易制故設衡于鼻置綏當牽行故亦置之于鼻

也須洗薦牲體故共其水橐也注釋曰司農云福衡所以福持牛也者司農意以衡為持故云所以福持牛以

鼻繩所以牽牛者今時謂之雉與古者名同者若然自

漢以前皆謂之綏案禮記少儀云牛則執紉紉則綏之

別名今亦謂之為紉也云皆謂夕牲時也者但夕牲在祭前之夕正祭在厥明二時皆有此事明據在前夕牲時而言也杜子春云福衡所以持牛令不得抵觸人者子春意福衡唯設于角與司農義同後鄭亦不從也玄謂福設于角者福者相福迫之義故知設於角云衡設於鼻者衡者橫也謂橫木於鼻今之駝猶然故知設於鼻破先鄭子春之義云如概狀者漢時有置於犬之上謂之概故舉之以為况衡者也云水橐給殺時洗薦牲也者其牛將殺不須飼之又充人已飼三月不得將殺始以水橐飲飼水所以洗牲橐所以薦牲故雙言洗薦牲也云紉字當以豸為聲

聲

歌舞牲及毛炮之豚注謂君牽牲入時隨歌舞之

言其肥香以歆神也毛炮豚者燂去其毛而炮之以備

八珍鄭司農云封人主歌舞其牲云博碩肥腍音義薄炮

交反燭似鹽反去疏釋曰言歌舞牲者謂君牽牲入時起呂反腍徒忍反疏封人隨後歌舞云博碩肥腍也云及毛炮之豚者謂造炮豚之時則燭去其毛以炮之也注釋曰案禮記祭義云君牽牲穆答君卿大夫序從是君牽牲入時也云隨歌舞之言其肥香以歆神也者解封人隨牲後歌舞之時節及使神歆享之意云毛炮豚者燭去毛而炮之者經直云毛炮恐人以并毛炮之案禮記內則有炮豚炮牂皆編萑以苴之塗之以墁塗孰乃擘去之彼雖炮亦不言去毛炮之鄭知去毛者牂豚之毛於牲無用空以汙損牲體故知凡炮者皆去毛也云以備八珍者彼內則八珍之中有炮豚此炮豚與彼同故知此炮豚以備足八珍也鄭司農云封人主歌舞其牲云博碩肥腍者此左氏桓公傳隨季良之辭彼云奉牲以告曰博碩肥腍引之者證封人歌舞牲時有此

辭也凡喪紀賓客軍旅大盟則飾其牛牲注大盟會同之

盟疏

釋曰言凡此下四事王之喪紀有牲者除朝夕奠用脯醢以外大小斂朔月月半薦新奠祖奠大遣

等皆有牲牢賓客有殺牲者唯據致殮及饗餼饗食皆有殺牲之事軍旅殺牲者謂饗獻軍吏大盟謂天子親往臨盟此一經皆用牛牲故總云飾其牛牲也注釋曰案觀禮及司儀諸侯時見曰會殷見曰同王皆為壇於國外行盟誓之法故鄭依而言焉

鼓人掌教六鼓四金之音聲以節聲樂以和軍旅以正

田役注音聲五聲合和者疏

釋曰言掌教者必教他官案眡瞭職發首云掌凡樂

事播鼗擊頌磬笙磬下又云掌大師之縣鑿愷獻亦如之雖不云擊鼓以上下文參之其五鼓是眡瞭擊之則

此所教者當教眡瞭也其晉鼓當教鐸師故其職云掌
金奏之鼓此下文云以晉鼓鼓金奏故彼鄭注云主擊
晉鼓是也又云六鼓四金之音聲者六鼓四金與音聲
和合故連言音聲也云以節聲樂者下云雷鼓靈鼓路
鼓晉鼓皆是也以和軍旅者下云以鼗鼓鼓軍事是也
云以正田役者下云以鼗鼓鼓役事是也田獵所以習
戰則田鼓當與軍事同案大司馬云王執路鼓諸侯執
賁鼓軍將執晉鼓之等是也此一經是與下為總目之
語也注釋曰案禮記學記云鼓無當於五聲五聲不得
不和則五聲須鼓乃和故鄭云五聲合和者鄭不解音
者單出曰聲雜比曰音音聲相將之物故釋五聲則含得音故不重云音也

聲用注教為鼓教擊鼓者大小之數又別其聲所用之

事音義

別彼疏

注釋曰鄭云教為鼓教擊鼓者大小之數者則雷鼓八面之等云而辨其聲用

鄭云又別其聲所用之事則下文雷鼓及四金聲之所用各不同是也 以雷鼓鼓神祀注

雷鼓八面鼓也神祀祀天神也疏釋曰天神稱祀地祇

靈鼓鼓社祭又案大司樂以靈鼓祭澤中之方丘大地

祇與社同鼓則但是地祇無問大小皆用靈鼓則此雷

鼓鼓神祀但是天神皆用雷鼓也注釋曰鄭知雷鼓八

面者雖無正文案韋人為皋陶有晉鼓鼗鼓鼗鼓三者

非祭祀之鼓皆兩面則路鼓祭宗廟宜四面靈鼓祭地

祇尊於宗廟宜六面雷鼓祀天神又尊於地祇宜八面

然也故知義以靈鼓鼓社祭注靈鼓六面鼓也社祭祭地祇

也疏釋曰郊特牲云社祭土神地之道則孝經緯云社

宗伯亦云血祭祭社稷五祀亦舉社以表以路鼓鼓鬼

地祇其實地之大小之祭皆用靈鼓也

享注路鼓四面鼓也鬼享享宗廟也音義

享許丈反劉虛讓反牛人

職疏

釋曰案大宗伯宗廟有六享禘祫四時皆言享先

同疏王則皆是大祭縱有享先公為次祀祭殤為小祀皆用此路鼓以其天神地祇大小同鼓故也

以鼓鼓鼓軍事注大鼓謂之鼓

鼓鼓長八尺音義

鼓扶疏釋曰案大司馬云春辨鼓鐸云反疏王執路鼓諸侯執鼙鼓軍將

執晉鼓鄭注云王不執鼙鼓尚之於諸侯門社軍以鼙為正無妨兼有路鼓晉鼓之等也注釋曰云大鼓謂之

鼙是訓鼓為大此唯兩面而已而稱大者此不對路鼓已上以其長八尺直對晉鼓六尺六寸者為大耳鼙鼓

長八尺以鼙鼓鼓役事注鼙鼓長丈二尺音義

鼙音疏

釋曰案縣詩云鼙鼓弗勝鄭云鼙鼓不能止之此云鼓役事謂擊鼓起役事與彼不同者但起役止役皆用鼙

鼓兩處義得相兼耳注釋曰丈二尺韞人文此既丈二尺大於鼗鼓不得大名但鼗鼓長八尺尚對晉鼓為鼗
明鼗鼓亦大可知不可同名
以晉鼓鼓金奏注晉鼓長為鼗故別以鼗鼓為號也

六尺六寸金奏謂樂作擊編鍾音義

編必疏釋曰凡作仙反樂則先擊

鍾故鍾師以鍾鼓奏九夏鄭云先擊鍾次擊鼓金則鍾也奏則擊也則是擊鍾後即擊鼓故云晉鼓鼓金奏注釋曰晉鼓長六尺六寸亦韞人文云金奏謂樂作擊編鍾者案磬師云擊編鍾鄭注云磬亦編於鍾言之者鍾有不編鍾又案鑄師云掌金奏之鼓然則磬師擊編鍾鍾師擊不編鍾又案鑄師云掌金奏之鼓鄭注云主擊晉鼓則此晉鼓和金奏但鍾之編與不編作之皆是金奏晉鼓皆和之矣鄭唯言編鍾據磬師而言其實不編者亦以晉鼓和之故鍾師云以鍾鼓奏九夏鄭云先擊次擊鼓是不編之鍾亦有鼓即晉鼓也
以金鑄

和鼓注鐸鐸于也。圓如碓頭，大上小下，樂作鳴之，與鼓

相和音義。

鐸音淳，碓音對。本作椎，直追反。

疏

釋曰：謂作樂之時，以此金鐸和於鼓節也。注釋

曰：鐸，鐸于也。

者，鐸于之名，出于漢之大予樂官并云其形圓如碓頭，大上小下，竝出彼文而知之。又云樂作鳴

之與鼓相和。此鄭以意解之。案下三金皆大司馬在軍所用，有文此金鐸不見在軍所用，明作樂之時與鼓相

和故也。以金鐸節鼓，注鐸鉦也。形如小鍾，軍行鳴之以

為鼓節。司馬職曰：軍行鳴鐸，音義

鐸直角反。鉦音征。

疏

釋曰：此謂在軍

之時所用節鼓與鼓為節也。注釋曰：鄭云鐸鉦也者，案詩有鉦人伐鼓就而解之，彼注鉦以靜之，此解以為軍

行所用不同者，義亦一也。以其動靜俱用故也。云形如小鍾者，亦據漢法而言也。云軍行鳴之以為鼓節，此依

大司馬文而釋故引彼文云軍行鳴鐃對上金鐃作樂為節案彼是公司馬所執也以金鐃止鼓

注鐃如鈴無舌有秉執而鳴之以止擊鼓司馬職曰鳴

鐃且卻音義

鐃女交反秉兵政反本疏釋曰此案春秋又作柄下同卻起略反左氏莊公傳曹

劇云一鼓作氣再而衰三而竭哀公傳陳書曰吾聞鼓而已不聞金矣是進軍之時擊鼓退軍之時鳴鐃注釋

曰云鐃如鈴無舌者亦約漢法而知也云有秉執而鳴之者案大司馬云卒長執鐃故知執而鳴之又引司馬職鳴鐃且卻者欲見軍卻以金鐃通鼓注鐃大鈴也退時鳴之是止鼓時所用也

振之以通鼓司馬職曰司馬振鐃音義

鐃待洛反疏釋鈴音零

此是金鈴金舌故曰金鐃在軍所振對金鈴木舌者為木鐃施令時所振言通鼓者兩司馬振鐃軍將已下即

擊鼓故云通鼓也注釋曰鐸大鈴亦約漢法知之引司馬職者案彼兩司馬執鐸所引司馬執鐸即兩司馬也

凡祭祀百物之神鼓兵舞帛舞者注兵謂干戚也帛列

五采繒為之有秉皆舞者所執音義

帛音拂疏釋曰上劉音弗

社祭鬼享文俱不及小神故此更廣見小神之事故云凡祭祀百物之神也云鼓兵舞帛舞者天地之小神所用帛舞今此兵舞帛舞二事案下舞師山川用兵舞社稷者舞帛舞故六舞之中唯言此二舞而已注釋曰兵謂干戚也者案司兵云祭祀授舞者兵鄭亦云授以朱干玉戚必知兵舞是干戚者見禮記樂記云干戚之舞非備樂祭統又云朱干玉戚竝是大武之舞是知兵舞干戚也又知帛舞列五采繒為之有秉者案樂師注帛凡五采繒今靈星舞子持之是舉今以曉古故知之也

軍旅夜鼓鑿注鑿夜戒守鼓也司馬法曰昏鼓四通為

大鑿夜半三通為晨戒旦明五通為發昫音義

鑿千歷反昫本

又作昫亦作煦休具反

疏釋曰在軍警戒急在於夜故

劉休武反或況家反

軍旅於夜鼓其鑿鼓以警衆

也注釋曰言鑿者聲同憂戚取軍中憂懼之意故名戒

守鼓為鑿也引司馬法曰

昏鼓四通為大鑿者欲取從

初夜即為警戒之意故擊鼓四通使大憂戚也云夜半

三通為晨戒者警衆豫使嚴備侵早當行云旦明五通

為發昫者旦明五通晨昫

軍動則鼓其衆注動且行疏

之時當發故云發昫也釋曰尋常在道欲行之時所擊之鼓則上注五通發昫

是也今別言軍動則據將臨陳之時

軍旅始動則擊鼓

以作士衆之氣故曹劌云一鼓作田役亦如之疏釋曰

氣鄭云動且行謂行前向陳時也

田獵

圍合之時必擊鼓象對敵故救日月則詔王鼓注救日

大司馬職云鼓遂圍禁是也月食王必親擊鼓者聲大異春秋傳曰非日月之眚不

鼓音義

音生疏

釋曰謂日月食時鼓人詔告于王擊鼓

贊王鼓鄭注云佐擊其餘面又云救日月食亦如之太僕亦佐擊其餘面鄭既云佐擊其餘面則非止兩面之

鼓案上解祭日月與天神同用雷鼓則此救日月亦宜用雷鼓八面故太僕與戎右俱云贊王鼓得佐擊餘面

也案莊二十五年左氏傳夏六月辛未朔日有食之鼓用牲于社非常也唯正月之朔慝未作日有食之於是

乎用幣于社伐鼓于朝若然此救日食用鼓惟據夏四月陰氣未作純陽用事日又太陽之精於正陽之月被

食為災故有救日食之法他月似無救理尚書胤征季秋九月日食救之者上代之禮不與周同諸侯用幣于

社伐鼓于朝退自攻責若天子法則伐鼓于社昭十七年昭子曰日食天子伐鼓于社是也注釋曰救日月食王必親擊鼓者聲大異者但日月食始見其微兆未有災驗故云異也引春秋傳者亦莊二十五年傳辭彼傳云秋大水鼓用牲于社于門亦非常也凡天災有幣無牲非日月之眚不鼓譏其為大水用鼓引之證其日月得有月鼓法春秋不記救月食者但日食是陰侵陽臣侵君之象故記之月食是陽侵陰君侵臣之象非逆事故略不

大喪則詔大僕鼓注始崩及窆時也疏

注釋曰案大僕

職云大喪始崩戒鼓傳達于四方窆亦如之是鄭所據也

舞師掌教兵舞帥而舞山川之祭祀教帔舞帥而舞社稷之祭祀教羽舞帥而舞四方之祭祀教皇舞帥而舞

旱暵之事注羽析白羽為之形如帔也四方之祭祀謂

四望也旱暵之事謂雩也暵熱氣也鄭司農云皇舞蒙

羽舞書或為翬或為義玄謂皇析五采羽為之亦如帔

音義

暵呼但反
翬音皇

疏

釋曰云掌教兵舞謂教野人使知之
國有祭山川則舞師還帥領往舞山

川之祀已下皆然案春官樂師有六舞并有旄舞施于
辟雍人舞施于宗廟此無此二者以卑者之子不得舞

宗廟之耐祭祀之舞亦不得用卑者之子彼樂師教國
子故有二者此教野人故無旄舞人舞注釋曰羽析白

羽為之形如帔也者但羽舞用白羽帔舞用五色繒用
物雖異皆有柄其制相類故云形如帔也云四方之祭

祀謂四望也知者若以四方連百物則四方不止四望
今單云四方四望五岳四瀆亦布在四方故知四方即

四望也云早暵之事謂雩也者春秋所云雩者皆釋早
又祭法云雩祭水旱故知早暵謂雩祭也云暵熱氣
也者以其旱時多熱氣又此暵字以日為形以漢為聲
者故知暵熱氣也鄭司農云皇舞象羽舞者先鄭之意
蓋見禮記王制有虞氏皇而祭皇是冕為首服故以此
皇為鳳皇羽蒙于首故云蒙羽舞自古未見蒙羽于首
故後鄭不從之矣云書或為皇或為義者禮本不同故
或為皇或為義皆不從之矣玄謂皇析五采羽為之亦
如帔者鍾氏染鳥羽象翟鳥鳳皇之羽皆五采此舞者
所執亦以威儀為飾言皇是鳳皇之字明其羽亦五采
其制亦如帔舞若然帔舞
羽舞皇舞形制皆同也
凡野舞則皆教之注野舞謂
野人欲學舞者疏釋曰案序官舞徒四十人其數有限
今云皆教之者數雖四十餘者有能
學皆教之以
凡小祭祀則不興舞注小祭祀王玄冕所
待其闕耳

祭者興猶作也疏

釋曰案上文云凡祭祀百物之神鼓兵舞帔舞又案司服云羣小祀則玄

冕注云羣小祀林澤墳衍四方百物之屬如是則小祭祀有兵舞帔舞而云不興舞者小祭祀雖同玄冕若外神林澤之等則有舞若宮中七祀之等則無舞此文是也

牧人掌牧六牲而阜蕃其物以共祭祀之牲牲注六牲

謂牛馬羊豕犬雞鄭司農云牲純也玄謂牲體完具音

義

蕃音煩疏釋曰云掌牧六牲而阜蕃其物者阜盛也牲音全疏蕃息也物謂毛物言使肥盛蕃息各有毛

物謂五官各有牛人羊人犬人豕人之等擇取純毛物者以供牧人牧人又供與充人芻之三月以祭祀故云以共祭祀之牲牲也注釋曰案爾雅所釋六畜有馬牛羊豕犬雞故鄭依而釋之案膳夫供六牲鄭注云始養

之曰畜將用之曰牲則此云牲亦據將用為言也司農云牲純也後鄭不從者尚書云犧牲對犧不得為純色其純下文毛之者是也故凡陽祀用騂牲毛之陰祀用玄易之云牲體完具也

黝牲毛之望祀各以其方之色牲毛之注騂牲赤色毛之取純毛也陰祀祭地北郊及社稷也望祀五嶽四鎮四瀆也鄭司農云陽祀春夏也黝讀為幽幽黑也玄謂

陽祀祭天於南郊及宗廟音義

黝於糾反疏釋曰言凡司農音幽與下陽祀

陰祀望祀等為目故云凡以廣之也注釋曰騂牲知是赤色者見明堂位周人騂剛檀弓云周人牲用騂周尚赤而云用騂故知騂是赤也云毛之取純毛也者對下文云龍是離色則此經云毛之者皆是取純毛也云陰

祀祭地北郊及社稷也并陽祀祭天於南郊及宗廟者
但天神與宗廟為陽地與社稷為陰案大宗伯云蒼璧
禮天黃琮禮地謂圜丘方澤下云牲幣各放其器之色
則昊天與崑崙畚牲用蒼用黃四時迎五方天帝又各依
其方色牲則非此騂牲黝牲惟有郊天及宗廟社稷一
等不見牲色在此陽祀陰祀之中可知案郊特牲云郊
之祭也大報天而主日兆於南郊就陽位也牲用騂是
南郊用騂也檀弓云殷尚白周尚赤是祭宗廟用赤也
據此而言則祭天於南郊及宗廟用騂也郊特牲云社
祭土而主陰氣也是社稱陰孝經緯鉤命決云祭地于
北郊就陰位彼對郊天就陽位則是神州之神在北郊
而稱陰以是知陰祀中有祭地于北郊及社稷也不從
先鄭陽祀春夏者周祭宗廟四時同用騂夏至祭地方
澤牲用黃春夏迎氣牲各隨方之色明不得同用騂故
不從也又知望祀是四望者以其言望與四望義同故
知是四望五嶽等也云黝讀為幽幽黑也者以其幽是

北方故從幽為黑也後鄭先解陰祀後釋凡時祀之牲陽祀者陽祀待先鄭釋訖隨後破之故也

必用牲物注時祀四時所常祀謂山川以下至四方百

物疏

釋曰時言凡者山川已下非一故亦言凡以廣之也必用牲物者對上方色是隨其方色不用龍虎

是雜色則此牲物者非方非雜雖不得隨方之色要於一身之上其物色須純其體須完不得雜也假令東方

或純黃純黑南方或純白純青皆得也注釋曰知時祀是山川以下至四方百物者案司服山川羣小祀林澤

四方百物在四望下此上文云天地四望此時祀又在四望下又四方山川之等亦依四時而祀故知時祀是

山川至百物鄭唯據地之時祀若天凡外祭毀事用龍之時祀日月已下亦在此時祀中也

可也注外祭謂表貉及王行所過山川用事者故書毀

為甌龍作廐杜子春云甌當為毀廐當為龍龍謂雜色

不純毀謂甌辜候禳毀除殃咎之屬音義

龍亡江反貉莫霸反甌丘

例反甌普通反辜音孤禳如羊反

疏

釋曰外祭毀事其神非一故云凡以廣之也注釋曰知外祭中有表

貉者據上文外神之中已云天地至四方百物依時而祭者已盡此別言外祭則外祭中唯有表貉之等案大司馬田獵之時立表而貉祭司几筵亦云貉用熊席又知外祭中有王行所過山川用事者案校人云凡將事于四海山川則飾黃駒大祝云大會同過大山山川則用事焉亦是非常外祭之事若然此云龍校人用黃駒者從地色黃亦據龍中有黃色者用之不必純黃也云毀謂甌辜候禳毀除殃咎之屬者此文承子春之下不言玄謂當是子春所解也案宗伯云甌辜祭四方百物而引九門磔禳又案小祝職云將事候禳皆是禱祈除殃

咎非常之祭用禴之類故引以為證也

凡祭祀共其犧牲以授充人繫之

注犧牲毛羽完具也授充人者當殊養之周景王時賓

起見雄雞自斷其尾曰雞憚其為犧音義

憚待旦反疏釋牧人

養牲臨祭前三月授與充人繫養之故云凡祭祀共其犧牲以授充人繫之注釋曰云犧牲毛羽完具也者云

犧牲不云拴則唯揀純毛者而鄭云完具者祭祀之牲若直拴未必純犧若犧則兼拴可知故鄭以完具釋犧

云授充人者當殊養之者牧人之牲未用祭者總在一處不殊今將以祭者則殊別繫養之云周景王時者此

春秋左氏傳昭二十二年王子朝賓起有寵於景王王與賓孟說之欲立之又云賓孟適郊見雄雞自斷其尾

問之侍者曰自憚其犧也遽歸告王且曰雞其憚為人用乎人異於是注犧者以喻人之有純德實宜為君彼

直云自憚其犧不云雞鄭以義增之耳引之者證犧是純色之意也凡牲不繫者共奉之

注謂非時而祭祀者疏

注釋曰云不繫者謂若上文凡外祭毀事用龙可也是非時而

祭祀者也

牛人掌養國之公牛以待國之政令注公猶官也疏

釋曰

云掌養國之公牛以待國之政令者政令則諸侯所須牛及牧人之事則供送之也注釋曰訓公為官者恐有公君之嫌但王家之牛若公廡之牛故須訓公為官是官牛也凡祭祀共其享牛求牛

以授職人而芻之注鄭司農云享牛前祭一日之牛也

求牛禱於鬼神祈求福之牛也玄謂享獻也獻神之牛

謂所以祭者也求終也終事之牛謂所以繹者也宗廟有繹者孝子求神非一處職讀為犧犧謂之杙可以繫牛犧人者謂牧人充人與芻牲之芻牛人擇於公牛之

中而以授養之音義

職戚音特或餘式反劉之式反注職同繹音亦徐音夕杙餘式反劉

餘則疏

釋曰云凡祭祀者祭祀非一故亦言凡以廣之云享牛者謂正祭之牛云求牛者謂繹祭之牛

云以授職人而芻之者謂授充人繫養者也注釋曰先鄭云享牛前祭一日之牛也者若以此為祭前一日夕牲時而言仍是正祭牛則不應以正祭而云前祭一日若不據祭祀以為齊時所食齊則十日不應惟止一日而已其言無據故後鄭不從也云求牛禱於鬼神祈求福之牛也者案上文凡牲不繫者共奉之謂非時而祭

則不繫之此經授職人繫之明非禱祈非時祭者故後
鄭亦不從也玄謂享獻也獻神之牛謂所以祭者也者
以其宗伯祭宗廟六者皆云享則享是正祭可知破先
鄭為前祭一日之牛也云求終也終事之牛謂所以繹
者也者今日正祭于廟明日繹祭在門外之西室故鄭
云孝子求神非一處以解求牛為繹祭之牛也故郊特
牲云祭于祊尚曰求諸遠者與是名繹祭為求也云職
讀為犧者凡官皆有職直云職人無所指斥但職犧聲
相近誤為職故讀從犧充人置犧入地之時犧犧然作
聲故以聲名其官也云犧謂之杙者爾雅釋宮文郭注
云槩也云犧人者謂牧人充人與者與疑辭疑之者凡
牲堪祭祀者則牛人選入牧人臨祭之前牧人乃授充
人充人乃繫養之令若即以犧人為充人則隔牧人故
連牧人而言之明先至牧人乃至充人經據後而言之
耳云牛人擇於公牛之中而以授養之者鄭直凡賓客
言養之者則養者之中還兼有牧人充人也

之事共其牢禮積膳之牛注牢禮飧饗也積所以給賓

客之用若司儀職曰主國五積者也膳所以間禮賓客

若掌客云殷膳太牢音義

積子賜反注同飧音孫

疏

釋曰言凡賓客者謂五等

諸侯來朝兼有臣來聘皆共牢禮積膳之牛也注釋曰鄭知牢禮飧饗者此一經皆謂致與賓客者下云饗食是速賓之禮也案大行人掌客皆云上公飧五牢饗饌九牢五積侯伯飧四牢饗饌七牢四積子男飧三牢饗饌五牢三積積之多少各視飧牢其膳則五等諸侯皆太牢故云牢禮飧饗也云積所以給賓客之用者謂行道之用遺人所云者是也又引司儀職曰主國五積者據上公而言也云膳所以間禮賓客者謂賓客未去之間致禮也又引掌客云殷膳大牢彼注饗食賓射共其云殷中也中間未去即是間禮賓客也饗食賓射共其

膳羞之牛注羞進也所進賓之膳燕禮小臣請執冪者

與羞膳者至獻賓而膳宰設折俎王之膳羞亦猶此音

義

食音嗣下文同冪疏釋曰饗者享太牢以飲賓獻依

民狄反折之設反九舉七舉五舉亦依命數無酒獻酬耳皆在於廟以速賓射者謂大射及與賓客射于朝天子諸侯射先行燕禮皆有殺俎故有牛也云共其膳羞之牛者謂獻賓時宰夫所進俎是也注釋曰引燕禮小臣請執冪者與羞膳者至獻賓而膳宰設折俎者案燕禮立賓後公卿大夫升就席小臣阼階下北面請執冪者與羞膳者注云執冪者執瓦大之冪也方園壺無冪羞膳者羞於公謂庶羞云云至主人獻賓賓西階上拜筵前受爵反位主人賓右拜送爵膳宰薦脯醢賓升筵膳宰設折俎此王與賓饗及賓射設俎時節及設人無文故云王之膳羞

亦猶此也。若然，饗食有牛，俎至於射禮。天子諸侯皆先
行燕禮，其牲猶得有牛者，但天子諸侯雖用燕禮，直取
一獻之禮，未旅而行射禮，其用牲則左傳云：「公當饗，雖
然，燕禮亦用牛與饗同。」若然，云膳羞則庶羞也不言正
俎之牛者，據庶羞而軍事共其犒牛，注鄭司農云：「犒師
言其實兼正俎矣。」

之牛音義

犒告報反注同

疏

釋曰：謂將帥在軍，牯犒之，賜牛謂之犒牛也。注釋曰：案左氏傳僖公

三十三年，秦師襲鄭，鄭商人弦高將市於周，過之以乘韋，先牛十二。犒師，雖非己之軍，師亦是犒師之牛，故引

以為證也。

喪事共其奠牛，注謂殷奠遣奠也。喪所薦饋曰奠。

音義

遣棄戰反

疏

注釋曰：喪中自未葬已前，無尸飲食，直奠

卑皆脯醢酒而已，無牲體，殷大也。唯有小斂，大斂朔月，月半薦新，祖奠及遣奠時，有牲體大遣奠非直牛亦有

馬牲耳故鄭云謂殷奠遣奠也鄭凡會同軍旅行役共云喪所薦饋曰奠以無尸故也

其兵車之牛與其牽傍以載公任器注牽傍在轅外輓

牛也人御之居其前曰牽居其旁曰傍任猶用也音義

傍薄浪疏釋曰會同軍旅兼言行役謂王行巡守皆六反注同疏軍從也云共其兵車之牛者但兵車駕四馬

之外別有兩轅駕牛以載任器者亦謂之為兵車故云兵車之牛也注釋曰云牽傍在轅外輓牛也者上云兵

車之牛據在轅內者別言與其牽傍故云在轅外輓牛也若然轅外在前者曰牽在旁者曰傍故鄭覆云人御

之居其前曰牽居其旁曰傍言人御之者以其在轅外將御為難故特言人御之也云任猶用也者謂在軍所

須之器物凡祭祀共其牛牲之互與其盆簠以待事注皆是也

鄭司農云互謂樞衡之屬盆簠皆器名盆所以盛血簠

受肉籠也玄謂互若令屠家縣肉格音義

互劉音護徐音牙簠音老

劉魯討反盛疏注釋曰先鄭上文樞衡共為一物後鄭音成縣音玄已不從今以互與樞衡共一彌不可玄

謂互若令屠家縣肉格其義可知但祭祀殺訖即有薦

燭薦孰何得更以肉縣于互乎然當是始殺解體未薦

之時且縣于互待解訖乃薦之故得有互以縣肉也故

詩云或剝或亨或肆或將注云肆陳也謂陳於互者也

充人掌繫祭祀之牲拴祀五帝則繫于牢芻之三月注

牢閑也必有閑者防禽獸觸齧養牛羊曰芻三月一時

節氣成疏

釋曰云充人掌繫祭祀之牲拴者但祭祀之牲皆體全具故以拴言之也云祀五帝者上

云掌繫祭祀之牲牲則總養天地宗廟之牲下別言祀五帝則略舉五帝而已其實昊天及地祇與四望社稷之等外神皆繫之也注釋曰云牢閑也者校人養馬謂之閑此養牛羊謂之為牢言閑見其閑衛言牢見其牢固所從言之異其實一物也云必有閑者防禽獸觸齧者案春秋有郊牛之口傷騶鼠食其角自外恐更有禽獸觸齧故鄭總云焉云養牛羊曰芻者此經云繫于牢芻之惟據牛羊若犬豕則曰豢又不繫之矣云三月一時節氣成者釋必以三月之意案宣二年公羊云帝牲在于滌三月何休云滌宮名養帝牲三牢之處也三牢者各主一月取三月一時足享先王亦如之疏釋曰上以充天牲是其三月之義也

外神已別于上故今以先王亦

凡散祭祀之牲繫于國如之亦繫于牢芻之三月也

門使養之注散祭祀謂司中司命山川之屬國門謂城

門司門之官鄭司農云使養之使守門者養之音義散

素

但反疏釋曰云散祭之牲直言繫于國門使養之不言

注同疏

三月則或一旬之內而已不必三月也案楚昭

王問于觀射父曰芻豢牲則不必三月其諸侯祭祀養

牲幾何對曰遠不過三月近不過浹日孔注云遠牛羊

豕近犬雞之屬則諸侯祭祀養牲亦得三月及旬則天

子亦有浹日之義若然此散祭祀亦可浹日而已注釋

曰鄭知散祭祀謂司中司命山川之屬者見上文陽祀

陰祀望祀皆云毛之社稷四望已入毛之科內下別云

凡時祀用牲物其中無社稷四望唯有天神司中司命

以上地神山川以下此散祭祀則上時祀之神也故知

散祭祀是司中以下言之屬者其中兼有林澤百物之

等也云國門謂城門司門之官者司門總主王城十二

門皆別有下士及府史胥徒今養牲者是十二門而云

司門之官者總官首而言之其實非司門自養則先鄭

云使守門者養之是也

展牲則告拴注鄭司農云展具也具牲若

今時選牲也充人主以牲拴告展牲者也玄謂展牲若

今夕牲也特牲饋食之禮曰宗人視牲告充舉獸尾告

備近之音義

近附近

疏

法釋曰先鄭以為選牲時後鄭不從者若是選牲時應在牧人

牧人選訖始附充人今既在繫養之下乃言展牲則告拴明非初選牲故不從玄謂展牲若今夕牲也者此舉

漢法以況之又引特牲禮者以其天子禮亡故舉以言焉案彼宗人視牲告充亦謂祭前之夕夕牲時云舉獸

尾者士用兔腊言獸尾止謂兔也言近碩牲則贊注贊之者彼謂士禮引證天子法故云近之

助也君牽牲入將致之助持之也春秋傳曰故奉牲以

告曰博碩肥腍疏

釋曰上經夕牲時此經據正祭時言碩牲者謂君牽牲入廟卿大夫贊幣

而從皆云博碩肥腍此充人既是養牲之官當助持牛糾而牽之注釋曰鄭知有君牽牲者見祭義云君牽牲穆答君卿大夫序從天子亦當然又引春秋傳者此春秋左氏傳楚武王侵隨隨少師請追楚師季良止之曰天方授楚楚之羸其誘我也臣聞小之能敵大也小道大淫又云令民餒而君逞欲祝史矯舉以祭臣不知其可也公曰吾牲牷肥腍菜盛豐備何則不信對曰夫民神之主也是以聖王先成民而後致力於神故奉牲以告曰博碩肥腍謂民力之普存是其事也

周禮注疏卷十二

周禮注疏卷十二考證

黨正及四時之孟月吉日疏一年七度讀灋者○七監

本訛作十今据上下文改正

族師春秋祭酺亦如之注族長無飲酒之禮○長當作

師

鼓人以鼗鼓鼓軍事疏案大司馬云春辨鼓鐸○辨監

本訛作執今据原文改正

軍動則鼓其衆注動且行○且或疑作旦者誤

舞師掌教兵舞疏釋曰羽析白羽為之形如帔也者○
監本脫此句今依注補之

凡小祭祀疏宮中七祀之等○祀監本訛舞此七祀謂
祭法七祀也今改正

周禮注疏卷十二考證